


# MPULUSU NA MUVIMBA

## NA YAWU, NA KIESE

 Mu ke na kiese na nkokila yayi, diaka, samu na kupesa beno mbote na Nkumbu ya Mfumu ya beto ya luzolo Yesu, Mwana ya Nzambi yina vumbukaka na lufwa. Mpe Mvwandulu ya Yandi vwandaka dezia awa ntangu mu me kota, na yina beto ke na kuvingila na kumona ya mingi, ya kulutila, “na zulu ya nionso yina beto lendaka sala to kubanza,” na nkokila yayi, ti Nzambi ke mwangisa na zulu ya beto, balusakumunu ya Yandi, mpe ke kumisa Yesu Klisto na kati ya beto.

<sup>2</sup> Mu vwanda zonza bankokila zole ya nsuka . . . Lumingu na nkokila mu banza ti beto vwandaka na lukutakanu ya kubeluka ya nzutu, mpe na Kilumbu ya ntete na nkokila mu vwandaka longa. Mpe mu zabisaka . . . Mu bandaka dilongi mosi, na Lumingu na suka, na tabernacle. Mpe mu banzaka, na ntangu beto vwandaka vingila nkonga ya bantu kukuma fioti mingi, mu zolaka kaka kotalisa bansatu ya munu. Mu kele . . .

<sup>3</sup> Mosi ya bilumbu yayi, kana Nzambi zola, mpe ke sadisa munu, mu ke zola kuzwa ba-campagne mingi kisika beno—beno ke . . . kukota kaka mpe kulonga to kupesa malongi na zulu ya Masonuku, mpe kusala balubokilu na autel, mpe kufukama na autel mpe kusambila samu na bantu, mpe mutindu beto ba-Baptiste ya ntama vwanda salaka. [Muntu mosi me tuba, “Amen.”—Mu.] Kaka ba-Baptiste zole mu me kuwa me tuba, “Amen.” Na yina wapi kisika beno yankaka kele, na nkokila yayi?

Muntu mosi tubaka, “Mpangi Branham, nge vwandaka Baptiste?”

Mu tubaka, “Yinga,” mu tubaka.

<sup>4</sup> Mu vwandaka longa awa na Arkansas, kilumbu mosi. Muntu mosi, bakala mosi ya kiboba, belukaka. Yandi vwandaka . . . bawu vwandaka . . . Yandi vwandaka Nazaréen. Yandi vwandaka na ba-béquille ya yandi na mukongo, kilumbu yina landaka, yandi vwandaka tambula na mbanza, na kidimbu mosi na zulu ya yawu, “Nzambi belulaka munu na yayi, mazono na nkokila.” Mpe yandi vwandaka kieleka kikata. Ya vwandaka na Little Rock. Mpe yandi vwandaka mutindu yina bamvula mingi. Mpe bantu nionso zabaka yandi, samu yandi vwandaka kwenda kuna, mpe vwandaka tulula yimpu ya yandi na ntoto, mpe vwandaka teka bilapi na kati ya yimpu. Mpe bantu nionso zabaka yandi, na yina kima yango zabanaka, ya salaka kima mosi ya nene na kati ya mbanza.

5 Mpe bankokila zole to tatu na manima ya yawu, mu vwanda longa, mpe—mpe yandi me telama. Yandi tubaka, “Vingila fioti, Mpangi Branham, ya ke yangisa nge kana mu me yufula nge kima mosi?”

Mu tubaka, “Ve, tata.”

6 Mpe yandi tubaka, “Mbote,” yandi tubaka, “ntangu—ntangu mu kuwaka nge kulonga, mu zabaka ti nge vwandaka Nazaréen.” Yandi tubaka, “Na yina mu monaka bantu nionso ya Pentecote awa, mpe muntu mosi tubaka na munu ti nge vwandaka Pentecotiste.” Yandi tubaka, “Mu kuwaka nge ke tuba, na mwa ntangu fioti me luta, nge vwandaka Baptiste.” Yandi tubaka, “Mu ke bakula yai ve.”

7 Mu tubaka, “Mbote, yina ke mpasi ve. Mu kele Pentecotiste Nazaréen Baptiste.” Ya kieleka. Ya kieleka. Beto ke kaka. . . kwikila.

8 Oh, bampangi, mu ke mundimi ya denomination ya dibuundu mosi ve, mpe kasi mu kele kaka mosi ya bawu. Ntangu mu basikaka na yayi, mu tubaka, “Klisto kele yintu ya munu. Biblia yayi kele buku ya munu. Mpe yinza kele dibuundu ya munu.” Na yina, ya kele—ya kele yina mu zola kuvwanda tii mu ke kufwa.

9 Ntangu yayi, na nkokila mosi to zole, beto ke meka na kubanda lukutakanu ya kubeluka ya nzutu diaka, ntangu beto ke. . . Na yina, na kumonaka bambeto yayi ya bambevo mpe bibrancard pene-pene awa, mu ke zola kumona kima mosi. Mu ke na ntima tiya-tiya ti kima mosi kusalama awa na Louisville, na Kentucky, samu yayi ke mbanza ya munu.

10 Mu me kuzwaka ata fioti ve balukutakanu ya mbote, yina beno ke bokilaka lukutakanu ya mbote, na Kentucky. Mpe mu zola kutuba yawu ve samu na kusawula. Mu—mu me kuzwaka mingi ya mpasi, bisika mingi. Kasi, mu zola kutuba, kaka awa na kisika ya munu mosi, ya kele mpasi mingi. Mu. . . ya ke mpasi mingi na kubuka yawu. Mu zaba kikuma ve. Kasi mu banza ti ya ke samu Yesu tubaka, “Na yinsi ya nge mosi,” mpe mutindu ya ke vwanda, ya kele kaka mutindu ya kele. Kasi beto ke mona ata fioti ve bimangu ya kulutila nene.

11 Mu vwandaka na lukutakanu awa, pene ya mvula mosi to zole me luta, na Jeffersonville, kasi ya salamaka ti kento yango me katuka awa na Kentucky kisika mosi kuna. Yandi kumaka mutindu, mpemba, kubanda bamambeke ya yandi na nsi; kubanda na luketo ya yandi na kukulumukaka na bamambeke ya yandi, mu zola kutuba. Mpe yandi—yandi vwandaka tambula ve, bamvula kumi na sambwadi. Mingi kati ya beno vwandaka kuna na nkokila yina, mpe beno ke bambuka moyo na diambu yango. Mpe yandi telamaka mpe kwendaka kuna na tabernacle, mbote-mbote.

12 Ntangu yayi, mu ke zola kima mosi kubanda awa na Louisville, kisika mu lenda mona reveil ya mutindu ya ntama kupanzana na mbanza ya kitoko yayi awa.

13 Ya kele mbanza mutindu bambanza nyonso yankaka; ya kele yimbi mutindu mosi. Beno zaba ti ya kele kieleka. Mu ke na kulwadisa ve na Kentucky; samu ti, mu kele muntu ya Kentucky, diaka. Mbote mingi. Kasi ya kele—ya kele kieleka. Ya kele yimbi. Yayi kele mbanza ya ba-wisky mpe bamalafu nionso ya tiya, bisika nionso ya mambu ya yimbi mpe bima nionso, ya mutindu yina, ya ke salama kaka na Louisville, na Kentucky awa, samu yayi kele kisika ya Satana.

14 Kasi beto lenda zenga yawu bitini-bitini na Nsangu ya mbote ya Yesu Klisto, kana beto nionso ke vukana kintwadi. Ya kele kieleka. Beto fwana vukisa bangolo ya beto kintwadi mpe kupusa kintwadi.

15 Mwa ntangu fioti me luta, evangeliste mosi ya lukumu na kati ya yinsi, yandi tubaka, yandi vwandaka tubila balukutakanu awa. Yandi tubaka, “Mbote, tala yina yawu kele.” Yandi tubaka, “Ntangu mu ke kwenda na mbanza mosi, nionso yina kele na kati ya yinsi ke simbisa balukutakanu ya munu to mu ke kwenda ve. Ya kieleka. Mbote, beno banza kaka. Mu banza ti ya kele na mabuundu makumi sambanu to makumi sambwadi ya Baptiste na Louisville. Beno me mona? Wapi mutindu samu na ba-Methodiste? Mpe ya kele mbanza ya ba-Methodiste; Asbury kele awa. Yinki bakala yayi ke kuzwa kana yandi kwisa na mbanza yayi, kaka na ba-Methodiste mpe ba-Baptiste, kukondwa kutanga ba-Presbytérien mpe nionso yankaka?”

16 Ntangu yayi mabuundu yikwa ya Nsangu ya mbote ya muvimba kele awa na kati ya mbanza? Mwa ba-mission zole to tatu kisika mosi kuna, kaka mabuundu ya fyoti, awa mpe kuna, mpe bawu kele na mvita mosi na yankaka.

17 Na yina ntangu beno ke kwisa awa, beno fwana tula ntima na ngolo ya ministere ya beno. Ya kieleka. Mpe na yina . . . muntu nionso vwandaka monana mutindu muntu ya politiki ke kwisa. Yina me tala na ngolo ya ministere ya beno, samu na kubenda nionso yina Mfumu ke tinda. Mu ke zolaka yawu mutindu yina. Mpangi-bakala, kana Yesu Klisto kele ve dikunzi ya munu awa, mpe kisika ya munu ya kutudila ntima, na yina mu kele na kima yankaka ve ya kutudila ntima. Ya kieleka. Yandi . . . Na Klisto, Ditadi ya ngolo, mu me telema; bisika yankaka nionso kele putulu, samu na munu. Mu ke zola kulonga na bantu tanu yina mu zaba ti Nzambi me tinda samu na kuwa Nsangu, na kisika kulonga na kumi ya mafunda yina ba me benda na mutindu ya politiki na kati ya yawu. Ya kieleka.

18 Mu ke zola kumona kubalula ntima ya mutindu ya ntama, muntu yina ke fukama na autel mpe ke boka mpe ke dila tii ya ke

basika kasi kumona mafunda kumi ya kutelama, ke tuba kaka, “Mbote, mu ke meka Yawu.” Beno meka Yawu? Yandi kele ve Klisto yina ba ke mekaka. Yandi kele Yina ba ke ndima. Beno zinga to beno kufwa, beno dinda to beno kufwa na masa, beno baka Yandi na mutindu nionso. Ya kieleka.

<sup>19</sup> Kana mu ke sambila, mu me sambila samu na mafunda kumi ya bantu na nkokila yayi, mpe bawu nionso kufwa na suka; mbasi na nkokila mu ke vutuka awa kusambila samu na bambevo, na kukwikilaka ti Ndinga ya Nzambi vwandaka kieleka. Ya kieleka.

<sup>20</sup> Kana mu vwandaka kufwa; mpe mafunda tanu ya bantu kufwaka bamvula nkama mosi me luta, mpe yina vwandaka na Seko ntangu yayi nionso, vumbukaka mpe vutukaka na ntoto, mpe tubaka, “Mpangi Branham, kutula kivuvu na Yawu ve. Yandi kele ya kusungama ve. Beno tula kivuvu na Yawu ve. Beto—beto tulaka kivuvu na Yandi, beto kwendaka; beto kubwaka.”

<sup>21</sup> Mu ke tuba kaka, “Bika mu kufwa na Yesu Klisto.” Ya kele kieleka. Mu ke kwikila Yawu. Mpe yina kele ntima ya munu ya muvimba, bima nionso kele ya kusungama na kati ya Yawu. Mpe mu ke kwikila Yawu na ntima ya munu ya muvimba, mpe mu ke tula ntima na Yandi.

<sup>22</sup> Mpe mu ke zolaka bantu ya Yandi. Mu ke zolaka beno, basitwaye ya Kimfumu ya Nzambi. Mpe mu ke zola kutelama na lweka ya beno, mpe kunata kizitu.

<sup>23</sup> Ntangu yayi, na nkokila yayi; mu zabisaka, mazono na nkokila, mu ke tuba na mwa ntangu fyoti na nkokila yayi, kana Mfumu zola. Mu zola ve kubumba beno ntangu mingi, mpe kulembisa beno, samu ti beto ke na kuingila . . .

<sup>24</sup> Mu me tula mutindu ya mika na ntuala ya Mfumu samu na lukutakanu yayi. Mpe mu ke vingila ti Nzambi kusala kima yina ke banda kubenda ya nene na lukutakanu awa na kati ya mbanza. Beno sambila, beno sala ndambu ya beno; na yina, ntangu Lufundusu ke kwisa, beto nionso lenda telema mpe kutuba ti beto me sala ndambu ya beto.

<sup>25</sup> Na kapu 20 ya Exode, mpe kubanda na nzila ya 7, mu zola tuba kaka na mwa ntangu fioti, kana Nzambi ke pesa muswa, na . . . mbote, mu ke tuba, ve dilongi mosi ya kulutila nene, kasi dilongi ya mbote. Lumingu me luta, na lukolo ya Lumingu na tabernacle na Jeffersonville, beto bandaka, na “mpulusu na nzila ya Menga.”

<sup>26</sup> Mpe awa kele yina mu ke na kumeka na kusala, kana beno zola kuzaba samu na yinki mu ke na kusalaka yayi awa. Mingi na kati ya beno ke tuba ti beno me monaka munu ata fioti ve kulonga na campagne ya kubeluka ya nzutu, kasi ya kele samu na lukanu mosi. Mu banza, kana mu lendaka nata myoyo kuvwanda na mpasi na ntima mpe kukwiza na autel, na yina mu ke kuzwa

luvalu na Nzambi samu na Louisville, ya kele kieleka, ntangu bantu ke belama kieleka ke kukikulumusana na ntuala ya Nzambi mpe ke sambila.

<sup>27</sup> Mpe, na yina, ya kele na mingi na kati ya beno, bankundi, yina ke na kusambila, kumanga na kudya, mpe beno ke na boma ya kubaka yina beno ke na kusambila. Ya kieleka. Beno me mona? Mbote, ya ke sala beno mbote ve na kumanga na kudya mpe kusambila, kaka kana beno ke na bisalu yina ke tambula na yawu. Lukwikilu ya beno, na yinza, ke sala beno mbote ata fioti ve kaka kana beno ke kwenda kuna, mpe beno kutana kima yango mbunzu na mbunzu, mpe beno baka yawu. Yimani. Beno fwana kwenda na ntuala. Beno fwana kwenda kaka kuna mpe kusala yawu, na mutindu nyonso. Ntangu beno ke lomba kima mosi, beno kwenda kusosa yawu. Nzambi tubaka ti ya kele ya beno, na yina beno baka kima yankaka ve. Beno kwenda kusosa yina beno me lomba. Beno sala yawu, mpe beno tala yina ke salama. Yinga. Beno vutuka ve—ve na manima mpe kutuba, “Mbote, mu ke sumba yawu kaka.”

<sup>28</sup> Mu ke baka yina kele ya kulutila mbote. Nzambi silaka munu, ya kulutila mbote, yawu yina mu ke zola. Mpe bamvula makumi zole na tatu mu me sadila Yandi, Yandi me pesa munu kisika yina. Mpe mu . . . Mpe ntangu nionso yina mu ke kwikila na Yandi mpe ke zolaka Yandi, mpe Yandi ke zolaka munu, ya ke vwanda kaka mutindu yina samu Yandi me tumama na ngolo na Ndinga ya Yandi. “Nyonso yina beno ke zola, ntangu beno ke sambila, beno kwikila ti beno ke kuzwa yawu, beno ke kuzwa yawu.” Ya kele yina Yandi tubaka. Ya kele kieleka? [Dibuundu me tuba, “Amen.”—Mu.] Ya kele mbote. Mbote mingi.

<sup>29</sup> Mu zola kuwa beno kutuba, “Amen.” Beno zaba, Mpangikento Hoover, *amen* zola kutuba “ya vwanda mutindu yina,” samu na munu, beno zaba. Mpe ntangu mu—mu ke banda na kutuba, mu ke kuwa muntu mosi ve ke tuba “amen,” mu—mu ke vwanda ya kuvwalangana.

<sup>30</sup> Awa ntama mingi ve mu vwandaka longa na mwa yinzo—Nzambi mosi ya fioti, mpe—mpe mu vwandaka kaka . . . Oh, mu ke vwandaka ve na mutindu ya mbote na kuvwanda na chaire, landila, mu banza, théologie ya kilumbu, samu mu banza ti mu me kuma fioti na mubulu. Mpe mu banza ti mu me dumuka na zulu ya chaire, mutindu *yayi*, mpe mu kangaka micro na diboko ya munu, mpe mu me vwanda kuna, mpe makulu ya munu na zulu, ke longa na ngolo nionso. Mu me vutuka na munu mosi; mu zabaka ve yina mu vwandaka sala. Na mwa minuti fioti, mu me zimbana diaka, mpe mu me kuma kuna na kati-kati ya kulwale, ke kufutika pantalon ya munu. Mu zaba ve samu na yinki, kasi mu vwandaka kieleka . . . Mu zolaka vwanda kuna na mwa ntangu fioti. Yawu yina kima mu zolaka tuba. Mu vwandaka kisika mosi kuna mu vwandaka kaka na kiese. Mu zingaka na yawu mwa bilumbu yina landaka.

31 Ya vwandaka na muntu yina kwizaka na munu, mpe yandi tubaka, “Tuba,” yandi tubaka, “wapi mutindu nge lenda longa, na bantu nyonso yayi ke tuba, ‘Amen?’”

Mu tubaka, “Yawu yina ke salaka ti mu longa.” Yinga.

32 Mu vwandaka na yimbwa ya kiboba. Mu vwanda zomba ba raton laveur. Mu banza ti mu ke na mingi ya bankundi ya Kentucky awa yina ke zolaka kuzomba ba-raton laveur. Na yina. . . Mpe yandi vwandaka tindika baniama nionso na kubumbama na yinti nyonso yina vwandaka, mpe vwandaka kuzwa yawu, na ngaanda ya mouffette; mpe yandi vwandaka na kima ya kusala na yawu ve. Ntangu yayi, yandi vwandaka landa yawu tii na nsi ya matiti. Mpe kima mosi kaka mu zolaka sala, mu zolaka kota kuna ve na nsi samu na kusosa yandi, ya kieleka. Na yina kima mosi kaka mu zolaka sala, kele kutelemisa matiti, mpe kusimba yandi mpe kuboka, “Kwenda, kanga yandi! Kwenda!” Mpe yandi vwanda kwenda kusosa mouffette.

33 Ntangu yayi mouffette ya kulutila yimbi mu zaba kele diabulu. Mpe kana beno zola kusimba mwa fioti, beno boka kaka “amen” mbala mosi na mwa ntangu fioti. Mpe mu—mu. . . Beto ke sala ti yandi bumbama na yinti, na mwa ntangu fioti, mpe beto ke kanga yandi. Beno me mona?

34 Beno zaba, Buddy Robinson, mingi ya beno me kuwaka yandi. Mutindu yina ve? Dibuundu ya ba-Nazaréen. Yandi tubaka, “Mfumu,” yandi tubaka, “pesa munu mukongo mutindu kitini ya yinti. Pesa munu luzabu mingi ya meno na moyo ya munu. Mpe bika mu nwanisa dyabulu ntangu nyonso yina mu kele na dinu mosi, mpe na manima mu ke tatika yandi na lufifini tii mu ke kufwa.” Mu banza ti ya kele mbote. . . Mpe yawu yina kaka yandi salaka. Yawu yina kaka yandi salaka; kuna, pene-pene ya bamvula nkama mosi, mpe ke na kulonga kaka Nsangu ya mbote.

35 Mu ke kuwaka ba-vétéran yayi ya ntama ke longakaka mutindu yina. Kilumbu yina, mu zibulaka radio, mpangi-bakala mosi ya kiboba, na nkumbu ya Mordochée F. Ham, pene-pene ya bamvula nkama mosi, ke na kulonga kaka Nsangu ya mbote. Mu tubaka, “Nzambi, sakumuna yandi, mpe bika ti yandi vwanda na bambwetete na yimpu ya yandi ntangu yandi ke kuma Kuna.” Mpangi Ham, mu me zaba yandi ntama ve. Mosi ya bilumbu yayi mu zola kutana na yandi na ntwala yandi kwenda, na Yinsi yina kuna. Mpe, na yina, yandi lenda pesa mbote na bantu mingi Kuna. Mu zaba ti yandi ke na bantu mingi yandi ke pesa mbote na ntangu yandi ke kuma Kuna, oh, samu ti yandi vwandaka vétéran ya ntama.

36 Mfumu kusakumuna beno ntangu yayi. Mpe ntangu yayi, ntete beto kota na Ndinga yayi, bika beto kulomba Nsoniki yina na kukulumuka mpe kumonisa Yawu pwelele na beto.

37 Tata ya beto ya Mazulu, beto ke belama na Nge, na nkokila yayi, na Nkumbu yina ya kitoko, ya lukumu mingi, ya Mwana ya Nge, Yesu; na kufungunaka masumu ya beto, ti beto kele ve ya kulunga samu na kutuba Nkumbu ya Yandi ya santu. Samu na . . . Dibuta nionso ya Mazulu me bokilama “Yesu.” Dibuta nionso na zulu ya ntoto me bokilama “Yesu.” Mpe na Nkumbu yina nionso ke fukama, mpe konso ndinga ke ndima Yawu, ata ti bawu kele bansumuki to basantu. Na yina, ntangu beto ke zonga na Nkumbu ya Yandi, mutindu beto ke tekita na bantima ya beto, na buzitu, mutindu beto ke zonga. Na yina beto ke lomba na Nkumbu ya Yandi, na luzitu nionso, ti Nge ke kwisa na beto na nkokila yayi, Mfumu.

38 Beto kele awa na kati-kati ya mbanza mosi ya nene, na mitindu nionso ya bima ya Satana yina me kanga bantu, na kompani ya bawu, bansaka ya mbongo, mpe kindumba, wiski, mpe makaya. Mpe, O Nzambi, mpe balongi mingi, na chaire, ke bika kaka yawu kuluta mutindu ya vwandaka kaka kima ya mutindu mosi na kati ya bantu.

39 Kasi, Nzambi, pesa beto ndinga ya bukebi, ti beto ke longa Nsangu ya mbote ya kusungama mpe ya kukwikama, kutula disoka na nsimbulu ya yinti, ti mingenzi kulemuka konso kisika yina. Kasi sadisa beto, Mfumu, samu na kusamuna lufundusu na zulu ya bima ya mutindu yayi, mpe kulonga Nsangu ya mbote ya Mwana ya Nge ya luzolo, Yesu.

40 Nzambi, pesa kima mosi yina ke ningisa mbanza yayi samu na Kimfumu ya Nzambi. Ti, ata mpe mabuundu, yina ke na kukwenda na ntwala na bansongi ya nzila, na mwa bamambebele fioti, O Nzambi, bika ti mabuundu ya bawu kufulukuka kulutila mingi na bantu ya mbote, ya busantu, na mutindu ya ntama, yina me butuka mbala zole. Pesa yawu, Mfumu. Mpe ti beto kuzwa reveil, na mutindu ya ntama, reveil yina Nzambi me fidisa yina ke ningisa nsongi na nsongi ya mbanza, yina ke katula yimbi nionso. O Nzambi, kupesa beto ve kaka mwa bilumbu ya lukutakanu. Pesa beto reveil yina ke kanga banganda, mpe yina ke sungika bima nionso; mpe ke sala ti bantu kukwiza, na ntangu ngunga ya yinzo-Nzambi ke bula, mpe bawu vukana na aatel mpe bawu sambila na ntwala nsangu ya pasteur, mpe bawu vwanda ya kukubama. Nzambi, pesa yawu.

41 Ntangu yayi, na nkokila yayi, ya lenda vwanda na bambevo awa, Tata. Mpe na ntangu beto ke tubila bambevo, to samu na bambevo, diaka, ti Mpeve-Santu kubelusa bambevo nionso na kati ya yinzo yayi. Vulusa nsumuki nionso. Beno vutuka na yinzo, konso retrograde yina me katuka ntama na nzila ya yandi.

42 Mpe ntangu yayi ti Mpeve-Santu kuvwanda Yina twadisaka munu na dilongi yayi, na nkokila yayi. Mpe bika ti Yandi baka bima ya Nzambi mpe kusadila kaka kisadi ya Yandi awa

mutindu kisadilu, mpe bika ti Nzambi kuzwa nkembo. samu ti beto me lomba yawu na Nkumbu ya Yandi. Amen.

43 Na nzila ya 7 ya kapu 20 ya—ya Nombres, beto ke tanga yayi.

*Mpe MFUMU zonzaka na Moïse, na kutubaka,*

*Baka nkawa, mpe vukisa kimvuka kintwadi, nge, mpe Aaron mpangi ya nge ya bakala, . . . tuba na ditadi na ntuala ya bawu; mpe ya ke basisa masa ya yawu, . . .*

44 Mu zola beno bakula ti, masa “ya Yawu.”

*. . . ya ke basisa masa ya Yawu, mpe nge ke basisila bawu masa na ditadi: na yina nge ke pesa masa na kimvuka mpe bibulu ya bawu.*

*Mpe Moise bakaka nkawa yina vwandaka na ntuala ya MFUMU, mutindu MFUMU tumaka yandi.*

*Mpe Moise na Aaron vukisaka dibuundu kintwadi na ntuala ya ditadi, mpe yandi tubaka na bawu, Beno kuwa . . . beno bimpumbulu; beto ke basisila beno masa na ditadi?*

*Mpe Moise zangulaka diboko ya yandi, mpe yandi bulaka ditadi bambala zole na nkawa ya yandi: mpe bamasa basikaka mingi, mpe kimvuka kunwaka, mpe baniama ya bawu mpe.*

45 Bika ti Mfumu kubaka mwa Bandinga yayi awa, mutindu beto ke vutuka na dilongi ya beto ya mazono na nkokila mpe beto ke nata yawu na yayi, kana Nzambi kuzola.

46 Mpe ntangu yayi, mu zola ti bambevo nionso yina kele awa, na nkokila yayi. . . Ntangu yayi, Billy kabulaka ata kalati ya bisambu ve bubu yayi, samu mu me tuba na yandi ve. Mu tubaka, “Kwenda kaka kuna, Billy, mpe tuba na Mpangi Cauble. Mpe bika mu. . .”

47 Mu ke na kumeka kima mosi, samu na nkembo ya Nzambi. Mu ke lomba kaka Nzambi na kusadisa beto, na kupesa beto mioyo yina ke kota na Kimfumu; mpe bakwikidi yina ke pesa ngolo na lukwikilu ya bawu, mpe ke mata, ata mpe kukondwa kima yankaka, ke kwisa mpe ke tuba, “Nzambi, mu ke kwikila na Nge, na Ndinga.” Yawu yina. Ya kele mutindu ya kieleka, mpe ya ntete, mpe ya kulutila mbote. Ya kele kieleka. Beno baka Nzambi na Ndinga ya Yandi. Na yina, kana beno lenda sala yawu ve, na yina, ya kieleka, Nzambi ke tinda bima yankaka kuna, mumbandu makabu mpe bidimbu, samu na ku—kusiamisa Ndinga ya Yandi, samu na kusiamisa Yawu na konso mukwikidi.

Ntangu yayi, Lumingu, beto monaka, “mpulusu na nzila ya Menga.”

48 Beto ke baka Israël ntangu yayi, na nzietolo ya bawu, kubasika na Égypte, kifwanisu ya yinza, na nzila ya bawu na Palestine, yinsi ya nsilulu. Mu banza ti ya ke kima mosi ya kitoko.



Mu ke zolaka yawu kaka. Ya kele kaka na kutala konso sabala, mu ke vwandaka samu na kutanga Buku yayi ya Exode, kana mu lenda, to na mutindu mu lendaka sala yawu. Mu zola yawu samu ti ya kele kifwanisu ya kulunga ya dibuundu bubu yayi, mutindu, mpe mutindu Nzambi ke na kusalaka. Mutindu na ntangu yina, yina Yandi salaka na kimuntu na ntangu yina, Yandi ke na kusala yawu na kimpeve ntangu yayi. Beno me mona yawu?

<sup>49</sup> Ntangu yayi, kuna Yandi twadisaka Israel, na kimuntu, kisika yina bawu monaka, bawu talaka, yandi basisaka bawu na yinsi mosi mpe nataka bawu na yinsi yankaka ya kimuntu.

<sup>50</sup> Ntangu yayi beto me tambula na Mpeve-Santu, samu na kukota na Yinsi ya nsilulu. Beno ke kwikila ti beto ke na kukwenda na Yinsi ya nsilulu? [Dibuundu me tuba, “Amen.”—Mu.] “Na yinzo ya Tata ya Munu ya ke na bisika mingi ya kuvwanda. Kana ya vwandaka mutindu yina ve, Mu zolaka tuba na beno. Mu ke kwenda mpe mu ke yidika kisika samu na beno.” Ya kieleka? [“Amen.”] Ntangu yayi beto ke na Yinsi ya nsilulu yina beto ke kwenda, mpe konso kilumbu ke talisa kitini ya kilometre; kilumbu yankaka, kitini yankaka ya kilometre.

<sup>51</sup> Mpe ya kele na kivudi ya nene kuna na ntwala ya beto, yina ba me bokila lufwa. Mpe ntangu nionso ntima ya beto ke bula, beto ke belama na kisika yina. Mosi ya bilumbu yayi, ya ke bula samu na mbala ya nsuka, mpe beto ke kota kuna. Mu zola vwanda kuna na ntangu ya munu, samu na kulungisa dikani ya munu; mutindu mu banza ya kele samu na mosi na mosi ya beno kele, na nkokila yayi. Ntangu mu zaba ti ya kele kaka na ntwala ya munu, mpe mu fwana kukutana na yawu, mu zola kuvwanda muntu koyi-koyi. Mu zola lwata kazaka ya ludedomo ya Yandi, kukota na yawu, na kuzabaka yayi, ti ya kieleka ti mu zaba Yandi na Ngolo ya mvumbukulu ya Yandi. Ya kele kieleka. Ti, ntangu Yandi ke bokila na kati-kati ya bantu ya kufwa, ba ke bokila munu na bawu yina ke zinga. Nzambi ke Nzambi ya moyo.

<sup>52</sup> Ntangu yayi, na ntangu ya nzietolo ya bawu na yinsi yayi, beto monaka ti Nzambi salaka—salaka manaka samu na bawu. Yandi nataka mpulusu, na nzila ya menga. Na yina beto ke mona, Yandi ke nata diaka, mpulusu, na nzila ya ngolo.

<sup>53</sup> Beto monaka, mazusi na nkokila, ti Yandi tulaka menga; yina vwandaka kifwanisu ya kitoko ya mukwikidi, ti, ntangu yandi me ndima lufwa ya Klisto na kisika ya yandi, na yina yandi ke kuma mwana ya Nzambi. Yandi ke banda na nzietelo ya yandi.

<sup>54</sup> Ntangu yayi, kima yina ke landa yina yandi fwana... na manima yandi me vuluka, na kimpeve.

<sup>55</sup> Ntangu yayi, lufwa ya mwana-dimeme yina zaba diambu ve pesaka luzingu na mukwikidi yina me zaba diambu. Ya ke kifwanisu ya kulunga ve ntangu yayi? Lufwa ya Muntu yina me zaba diambu ve, ke pesa Luzingu na muntu yina me zaba

diambu. Mpe lufwa ya Klisto yina me zaba diambu ve pesaka Luzingu na beto bantu zaba diambu.

<sup>56</sup> Ntangu yayi, ntete, kuna, na manima Nzambi pesaka bawu luzingu na nzila ya menga, mpe me siamisa yawu, samu ti lufwa lutaka na zulu ya bawu, Yandi bandaka bawu na nzietelo ya bawu. Beto ke simba bawu na mwa ntangu fioti.

<sup>57</sup> Ntangu yayi beno tala, na yina, kima ya kulanda yina Nzambi salaka, kaka ntangu bawu kumaka bakwikidi mpe bana, mpe ndimaka Nzambi, mbeni ya lufwa ya nzutu landaka bawu. Mpe yandi kangaka bawu kuna na nsongi, kuna; na ntoto ya kuyuma na lweka mosi; Mubu ya Mbwaki na lweka yankaka; myongo na lweka yankaka; makesa ya Pharaon vwandaka kwisa, vwandaka landa, mafuku ya basoda vwandaka tambula na zulu ya bawu, samu na kununga bawu.

<sup>58</sup> Ntangu yayi, Nzambi talisaka ntete ti Yandi pesaka bawu luzingu, na nzila ya lufwa ya mwana-dimeme; ntangu yayi Yandi ke lakisa bawu mpulusu ya nzutu. Alleluia! Beno me mona, nionso zole samu na mpulusu mpe kubeluka, beno me mona, samu na muntu ya kimuntu mpe muntu ya kimpeve.

<sup>59</sup> Wanzio ya lufwa lutaka na zulu ya bawu, na kulakisaka ti Nzambi salaka nzila ya kutinina, na nzila ya dikabu ya menga, mpe bawu ndimaka yawu. Ntangu yayi Yandi ke sala nzila ya kutina lufwa ya nzutu.

<sup>60</sup> Mutindu mukwikidi, na ntangu yandi ke vuluka. Mbala yankaka cancer me kanga yandi, to kimbevo mosi. Nzambi kele na mpulusu, mpe, na nzila ya ngolo. Mutindu mosi Yandi ke na mpulusu samu na moyo, Yandi kele na mpulusu samu na nzutu. Ya vwandaka. . .

<sup>61</sup> Bawu kuzwaka mpulusu, mpe bawu kuzwaka nzengolo. Bawu vwandaka na nsi ya menga, kasi, Pharaon vwandaka kwenda. . . Mbeni zolaka bebisa bawu, kufwa bawu nyonso kaka kuna na ntoto ya kuyuma, na yina Nzambi lakisaka ngolo ya Yandi ya mpulusu samu na nzutu ya bawu. Beno me bakula yawu? Beno zaba yina mu ke na kuzonzila? [Dibuundu me tuba, "Amen."—Mu.] Mpulusu na nzila ya ngolo! Na yina, ntangu mbeni vwandaka pene-pene ya bawu, Dikunzi ya Tiya ya nene ya kimpeve telemaka na zulu ya Israel, kwisa mpe telemaka kati-kati ya bawu na lufwa.

<sup>62</sup> Beno bika yawu kota mbote-mbote na mwa ntangu fioti. Beno lenda mona yina mu ke tuba? [Dibuundu me tuba, "Amen."—Mu.]

<sup>63</sup> Ntangu yayi, samu na konso mukwikidi, mwana ya Nzambi yina me butuka mbala ya zole, ntangu lufwa ke kwisa na kielo mutindu muyibi, na ntwala ya ntangu, Wanzio ya Nzambi ke telama kati-kati ya beno mpe kimbevo. Ntangu yayi, kana beno zola kwenda mbangu na ntwala na yawu, yina kele dyambu ya

beno; kasi beno fwana sala yawu ve. Beno me mona? Yandi kele ya kutelama kati-kati ya beno mpe lufwa.

<sup>64</sup> Bamvula makumi zole na tatu me luta, na Lupitalu ya ba-Juif, Docteur Morris Fletcher pesaka munu bangunga tatu; mosi ya ba-chirurgien ya beno ya kulutula mbote na kati ya mbanza, pesaka munu bangunga tatu samu na kuzinga. Mu ke na kuzinga, na nkokila yayi. Alleluia! Samu na yinki? Na nzila ya lemvo yina mu lendaka kuzwa ve, Wanzio ya Nzambi telamaka kati-kati ya munu mpe lufwa, samu na kukeba munu, mpe mu ndimaka Yawu. Mpe samu na kuvutula matondo, na lemvo ya Nzambi, mu me nunga ndambu ya mafuku ya mioyo samu na Yandi, na nkokila yayi.

<sup>65</sup> Oh, mutindu Nzambi zaba wapi mutindu ya kusala bima, kana beto ke landa kaka. Beno meka ve na kutwadisa Nzambi. Beno bika Nzambi kutwadisa beno. Beno me mona? Beto kele bayina ba ke twadisa. Mu banza kikuma yawu yina Nzambi ke fwanikisa beto na mameme.

<sup>66</sup> Beno me monaka ntete dimeme yina me zimbana? Oh, yandi kele kivangu ya kukondwa lusalusu ya kulutula na yinza. Yandi lenda ve kuzwa nzila ya yandi kisika mosi. Yandi ke telama kaka kuna mpe ke dila tii kibulu ke kudia yandi, to yandi ke kufwa kuna. Yandi lenda ve kuzwa nzila ya yandi.

<sup>67</sup> Mpe ya kele mutindu, ti, ntangu muntu me zimbana, yandi kele ya muvimba ya kukondwa ngolo lusalusu. Ya kele ve na kima yina beno lenda sala samu na yawu. Nzambi, na nzila ya lemvo, fwana twadisa beno na Klisto. Yesu tubaka, “Muntu ve lenda kwisa na Munu kana Tata me benda Yandi ve. Mpe yina nionso Yandi me benda, mpe ke kwisa, Mu ke pesa yandi Luzingu ya kukonda nsuka.” Yina ke nsilulu!

<sup>68</sup> Oh, mu zolaka kunata muntu nyonso na kati awa, na kubika yawu kukota na mudindu na nsi ya lupanzi ya tanu na lweka ya kikento, tii ya ke kuma na kati-kati ya ntima. Beno ke mona bantu kutelema, yina vwandaka na bimbevo ya mutindu na mutindu me kangama na bawu, ke basika na kati ya kivinga yayi, ke sepela, ke manga na kundima yawu. Bikata ke tambula kaka mbote. Bawu ke manga na kuzaba kima yankaka. Beno me mona?

<sup>69</sup> Beno kele na boma. Beno kele na boma ya kubanda. Beno ke vingila ti Nzambi kukulumuka mpe kubasisa beno kuna. Nzambi ke salaka yawu ve mutindu yina. Beno fwana tula kitambi. Yandi pesaka nsilulu, mpe tubaka, “Kwisa,” na yina beno ke landa.

<sup>70</sup> Ntangu yayi beno tala bana ya Israël, na ntangu yina. Nzambi kwizaka mpe telamaka kati-kati ya bawu mpe kigonsa; ngolo ya mpulusu. . . mpulusu na nzila ya ngolo, mu zola tuba. Mpulusu na nzila ya menga; mpulusu na nzila ya ngolo.

<sup>71</sup> Mazono na nkokila beto bikaka bawu, ba vwandaka komvula kaka na kumu, na simu yina ya Mubu ya Mbwaki.

Bambeni nionso, bapiné ya ba-pusu ya bawu katukaka. Bampunda ya bawu bakaka boma, kaka kuna na kati-kati ya nzadi, mpe bawu vwandaka baluka na balweka nyonso, na kukwendaka mutindu *yayi*, mpe bapiné dindaka na poto-poto mpe katukaka. Mpe nkonga ya bantu vwandaka kima mbangu mutindu bilawu, bambeni. Mpe Israel mataka kuna na kumu, samu na kutala Nzambi ke telemisa diboko ya Yandi samu na kubebisa bambeni nionso.

<sup>72</sup> Kifwanisu mosi ya kitoko, mukwikidi, na nsi ya Menga; yina me beluka na ntangu yina na nzila ya, na ngolo ya Nzambi yina ke keba luzingu ya yandi, yina ke kumisa yawu yinda samu na ntangu mosi. Bawu zolaka kufwa, bawu nionso, kaka kuna; yandi zolaka kufwa bawu kuna na ntoto ya kuyuma, kana Nzambi telemaka ve na kati-kati ya bawu. Mu zolaka kufwa, kubanda ntama, kana Nzambi telemaka ve kati-kati ya munu mpe lufwa. Konso mukwikidi na kati awa zolaka kufwa, kubanda ntama, kana Nzambi telemaka ve kati-kati ya beno mpe lufwa; mosi na mosi ya beno. Na yina, Nzambi, na lemvo ya Yandi ya nene mpe kyadi, ke telama kati-kati ya mukwikidi mpe lufwa. Alleluia!

<sup>73</sup> Yawu yina. Na yina yinki kele kima ya kulanda samu na mukwikidi? Kima ya kulanda kuna kele mbotika ya Mpeve-Santu. Moise twadisaka bana ya Israel tii na Mubu ya Mbwaki, ba botikaka bawu na Mubu ya Mbwaki. Mubu, masa, ke talisa Mpeve. Ntangu yandi bulaka Ditadi, masa basikaka. Mpe ya vwandaka kifwanisu ya Klisto, na Jean 3:16. “Nzambi zolaka mingi yinza, Yandi pesaka Mwana ya Yandi mosi kaka, ti muntu nionso ke kwikila na Yandi ke kufwa ve, kasi ke kuzwa Luzingu ya kukonda nsuka.” Beno tala, bantu yina vwanza kufwa, na ntoto ya kuyuma, kuzwaka mpulusu na nzila ya Ditadi yina ba bulaka. Mpe bantu yina ke na kufwa me kuzwa mpulusu bubu yayi (ke na kufwa na disumu, ke na kufwaka na disumu ya nkú) samu Mwana ya Nzambi yina ba bulaka bakaka kisika ya bawu; masa, Mpeve, yina ke na kubasika!

<sup>74</sup> Beno tala mbote, mu zola beno mona yawu ntangu yayi, na yina bawu lutaka na Mubu ya Mbwaki, ya vwandaka kifwanisu ya kuzwa Mpeve-Santu. Na manima mukwikidi me vuluka na lufwa, samu na Luzingu; ngolo ya Nzambi me belusa nzutu ya yandi; ntangu yayi yandi kele candidat samu na mbotika ya Mpeve-Santu. Ntangu yayi yandi me sala nzietolo, kuna, na ntwala ya yandi; kasi, ntete yandi kutana na nzietolo yina, yandi fwana kuzwa kima mosi samu na kutwadisa yandi. Amen. Kifwanisu ya kulunga ya Pentecote!

<sup>75</sup> Beno tala, mutindu bawu vwandaka kukomvula na kumu. Konso mukwikidi, ntangu beno me kwisa mpe beno me kuzwa mpulusu, beno me ndima Menga ya Yesu, beno ke meka dyaka na kukangama na *yayi* mpe kukangama na *yina*, mpe beno lenda ve kubika *yayi* mpe beno lenda ve kubika *yina*. Na manima ya mwa

ntangu fioti, Nzambi lenda sala mambu ya mbote samu na beno; kasi beno lenda yambula ve makaya ya beno, beno fwana kunwa malafu ya kimvuka na bankundi konso ntangu. Kasi yina beno ke na yawu nsatu kele kuzabuka na Mubu ya Mbwaki.

<sup>76</sup> Ntangu bawu basikaka na simu yina. Yawu yina. Mu zola beno kumona yawu. Na yina bawu vwandaka basika na simu yina, ba vwandaka komvula na kumu mpe vwandaka tala na manima, mpe bawu monaka bamfumu yayi nionso ya ntama ya kisalu yina vwandaka bula bawu, yina kufwaka ndambu na kati ya bawu. Kaka mutindu cancer mpe makaya mpe tabako mpe wisiki mpe bima nionso yankaka, yina ke kumisaka bantwenia bilawu, yina ke fidisa bawu na bayinzo ya bilawu, na balupitalu, mpe yina ke basisa nkonga ya bantu ya kidi-kidi mpe nionso yankaka na yinza. Ntangu ba talaka na manima mpe ba monaka bima nionso yina vwandaka nwana, kukondwa lusalusu, mpe vwanda kufwa na mubu. Mpangi-bakala, beno ke zonzila lukutakanu; bawu kuzwaka mosi!

<sup>77</sup> Moise! Oh, mu ke bika yayi kota na mudindu. Mu banza ti ya ke kulumuka na nsi. Moise, profete ya kulutila nene yina me zingaka ntete ve, na nganda ya Yesu Klisto. Ata mbala mosi ve ti Nzambi me zonzaka, mutindu Yandi salaka yawu na Moise, na ngaanda ya Klisto. Yandi tubaka, “Kana ya kele na mosi yina kele ya kimpeve, to profete, na kati-kati ya beno, mu ke lakisa yandi ba-vision mpe ke sala Munu mosi kuzabana na yandi. Kasi kisadi ya Munu ve Moise; Mu ke tubaka na yandi yinwa na dikutu.” Ya kieleka.

<sup>78</sup> Moise, bakala yayi ya lukumu. Kaka ntangu yandi lutaka na nzingulu yina, yandi monaka bamfumu yina nionso ya kisalu me kufwa, yandi zabaka ti bima nionso yayi me kwenda kimakulu. Bima yina nionso vwandaka tindika bawu, mpe vwandaka bula bawu, mpe vwandaka bula bawu fimbu, sukaka. Yandi telemisaka maboko ya yandi mpe yimbaka na Mpeve. Oh, la la!

<sup>79</sup> Ata mbala mosi ve ti ba me fwanikisaka yawu, mpe ba ke fwanikisa yawu ve, tii beto ke kuma na Nkembo. Ntangu nionso sukaka kuna, yandi yimbaka na Kimpeve. Mpe ntangu beto me kuzwa mpulusu na kati ya nzutu. . .

<sup>80</sup> Yina vwandaka kifwanisu ya Mpeve-Santu yina kwisaka na Pentecote, ntangu beto lutaka na mubu. Ya vwandaka kifwanisu ya Pentecote. Mpe Moise, na anti-. . .kuna na kifwanisu na ntangu yina kuna, ntangu yandi lutaka kuna, yandi yimbaka na Mpeve. Yawu kwisaka na Kilumbu ya Pentecote. Mpe ntangu nzutu ke kuzwa mpulusu, ya kulunga. . . Ntangu yayi moyo ya beto kele na mpulusu ya kulunga, kieleka, “lenda kufwa ve; kuzwa Luzingu ya kukonda nsuka.” Yawu yina Biblia me tuba!

<sup>81</sup> Oh, mu ke kuwa mbote. Beno tala samu na yinki. Samu ti mu zaba ti ya kele MUTINDU ME TUBA MFUMU. Mu ke kotisa kaka moyo ya munu kuna, mpe kwenda na ntuala, mpe ke tuba,

“Satana, bula kaka mwita mutindu nge zola, samu na munu. Ya ke sala munu mpasi ve, samu ti mu zaba Yandi yina mu me kwikila, mpe mu me ndima ti Yandi ke na ngolo ya kukeba yina mu me pesa na Yandi tii na Kilumbu yina.” Amen.

<sup>82</sup> Yina beto ke na yawu nsatu na nkokila yayi kele reveil ya mbote, ya ntama, ya alleluia, na mutindu ya Billy Sunday, yina ke buka beto, yawu yina beto zola na Louisville awa. Ya kele kieleka, beto kele na nsatu ya reveil ya ntama ya pentecote, yina Nzambi me fidisa. Yinga, tata.

<sup>83</sup> Beno tala, na yina, ntangu banzutu ya beto me kuzwa mpulusu. . . Na yina, beto kele na kubeluka ya Kinzambi ntangu yayi, mutindu kivudi.

<sup>84</sup> Mutindu ya vwandaka kuna kivudi mosi ya Pentecote, beno tala yina bawu salaka na ntangu ya kivudi, ya mpulusu. Beno tala mutindu bawu tambulaka kuna na ntuala ya Nzambi, “Bawu fwaka. . . ya meno mpe. . . ya tiya, bawu tinaka ntama na meno ya mbele,” bima yayi nionso bawu salaka, “basikaka na mabulu ya tiya; basikaka na dibulu ya bankosi, mpe nionso yina,” na kivudi, alleluia, na kivudi ya Pentecote.

<sup>85</sup> Ntangu yayi beto kele na mpulusu ya kulunga na nzila ya Menga ya Klisto. Ba zolaka vwanda ve na mpulusu ya kulunga na ntangu yina, samu ti ya vwandaka na yisi ya menga ya bangombe mpe bankombo, mpe yina ke katula disumu ve; ya ke fikaka disumu. Kasi ntangu Menga ya Yesu tiamukaka, Menga ya kulutula mbote mpe ya kulutula busantu, masumu vwandaka ya kufika diaka ve; bawu kabwanaka mpe vwanzaka yawu, mpe mukwikidi kwendaka na Ntwala ya Musadi na yandi. Alleluia!

<sup>86</sup> Kana bawu salaka yawu na ntangu yina, kivudi kuna, ya Moise vwandaka yimba na Kimpeve; na yina, kuna na Apocalypse, bayina me kuzwa mpulusu ya kulunga ya nzutu, telamaka na mubu ya ditenzi mpe vwandaka yimba nkunga ya Moïse dyaka, na Buku ya Apocalypse.

<sup>87</sup> Beno ke zonzila lukutakanu ya Mpeve-Santu? Bawu kuzwaka yawu ntangu bawu mataka na kumu yina. Beno kuwa, mpangi-kento. Mwa Miryam ya kifuluka na lukumu, profete ya kento, mpangi ya Moïse ya kento, profete ya kento, yandi zatukaka tii yandi bakaka tambourin mpe kwendaka mbangu na kumu, na kubulaka tambourin, mpe ke kina na Mpeve. Yina kaka ve, kasi bana-bakento nionso ya Israel vwandaka landa yandi, ke kina na Mpeve. Kana ya kele ve kutiamukaka ya Mpeve-Santu, mu me monaka ntete ve muntu mosi. Na yina, ya kieleka, yayi, kana bayinsi yayi nionso ya ba-rite, ya kifuluka na lukumu zolaka tala na ba-jumelle ya bawu mpe kumona yayi, bawu zolaka tuba, “Bufanatiki.” Kieleka. Kasi ya vwandaka Nzambi. Kieleka!

<sup>88</sup> Bima ya lukumu ke tala na zulu, bubu yayi, yina Nzambi me sakumuna. Ya kieleka!

89 Mu ke bambuka moyo na disolo mosi. Muntu mosi vwandaka na ferme mosi ya nene mingi. Yandi tungaka bibumbulu ya nene mpe ya kitoko, yina ya lukumu mpe ya kitoko mingi, kasi yandi vwandaka koyi-koyi mingi samu na kubundula ntoto. Mbote mingi. Ya vwandaka na fermier yankaka yina vwandaka zinga pene-pene ya yandi; yandi vwandaka na kibumbulu ya mbote mingi ve, kasi yandi vwandaka fermier ya kieleka, mpe yandi fulusaka madia mingi ya kitoko na kibumbulu na mvula yina. Mpe mwa bibulu zole butukaka, mosi na kati ya mosi ya bibumbulu, mosi yankaka na yina yankaka. Ntangu printemps kwisaka, ba basisaka mwa bibulu yina ya fioti na kidikilu.

90 Mwa mwana-ngombe yina kwisaka awa, vwandaka kudia mbote mingi, oh, ntangu mupepe yina bandaka na kubula yandi, oh, la la, makulu ya yandi vwandaka na zulu, mpe yandi kwendaka, na ngolo nionso mutindu yandi lendaka kwenda; na kubokaka, mpe ke dumuka, mpe ke kwenda, na kusepelaka.

91 Mpe na manima fermier yankaka me basisa ya yandi, kuna. Yandi vwandaka—yandi vwandaka ve na kima ya kudia kasi kaka matiti ya yimbi; yandi vwandaka koyi-koyi mingi samu na kubundula ntoto, samu kupesa yandi madia.

92 Ya ke bambuka munu moyo na ba-pasteur yayi. Ya kieleka! Ya kieleka! Ya koyi-koyi mingi! Ya ke na mfunu mingi ve. Mpe kaka bibumbulu ya kulutila kitoko beno ke na yawu. Beno tula kaka Madia kuna samu na mwana-ngombe! Kieleka. Kieleka. Mbotika ya Mpeve-Santu, yina ba me longa na ngolo, ya ke yoka mpusu ya bawu. Ya kieleka. Kasi yawu yina ba ke na yawu nsatu, kuyokama ya mpusu na mutindu ya ntama; yawu yina dibuundu ke na yawu nsatu, yawu yina bamambele ke na yawu nsatu. Beno tala.

93 Mpe mwa mwana-ngombe yayi ya fioti bebaka. Mwa mwana-ngombe yayi, vwandaka ya kukonda mingi na kubasikaka na kidikilu, yandi lendaka tambula na mpasi. Mpe yandi talaka na mpwasa mosi, mpe yandi talaka na simu yina.

94 Mpe yandi monaka ti mwana-ngombe yina vwandaka pema kaka na kikesa. Yandi vwandaka nene mpe na mavimpi ya mbote. Yandi vwandaka kaka mbote. Yandi vwandaka na madya hiver nyonso.

95 Mpe mwa mwana-ngombe yayi, yina vwandaka kufwa na nsatu talaka yandi, yandi tubaka, “Bufanatiki yayi!” Oh! Kieleka, yandi vwandaka ya kukonda mingi samu na kubanza kima yankaka.

96 Kasi, mu ke tuba na beno, ntangu yina vwandaka na mafuta mingi kuna, hiver nionso, mpangi-bakala, yandi zabaka kisika yandi vwandaka. Yandi vwandaka lutisa ntangu ya mbote ntangu mupepe yina ya tiya bandaka na kubula na zulu ya yandi.

<sup>97</sup> Mpe konso muntu yina me butuka na Mpeve ya Nzambi, ba ke bokila yandi fanatiki to nionso yina. Kasi ntangu mupepe yina ya tiya, ya printemps, ya Mpeve-Santu ke banda na kukwisa mutindu Yawu salaka na Kilumbu ya Pentecote, kima mosi ke salama. Kieleka. Mipepe ya tiya ke banda na kubula; mpangi-bakala, beno kele ya kufuluka na mafuta ya Nsangu ya mbote, na mavimpi ya mbote mpe nsatu ya mbote. Makulu na zulu mpe beno ke lutisa ntangu ya mbote.

<sup>98</sup> Ya kele mutindu yina Miryam mpe bayankaka salaka. Bawu talaka kuna na nsi mpe monaka bima nionso yayi yina ba vwandaka sala ntete, nionso vwandaka me kufwa mpe me zimbana. Bawu monaka Nzambi me ndima menga; monaka ngolo ya Yandi na kubeluka ya Kinzambi, ya kutelama na kati-kati ya bawu; bawu zabukaka Mubu ya Mbwaki, mpe ba botikaka bawu na Mpeve; ba vwandaka tambula na simu yina yankaka, na kulutisaka ntangu mosi ya mbote. Ba vwanda kipe ve yina...ba-organisation nionso vwandaka banza na yawu. Amen.

<sup>99</sup> Wapi mutindu ya kele kifwanisu ya kulunga bubu yayi, ya mukwikidi yina ke meka na kutula kitambi.

<sup>100</sup> Nzambi silaka ti Yandi ke pesa bansatu ya bawu nionso. Yandi silaka ti Yandi ke pesa bansatu ya beto nionso. Yandi tubaka na bawu ata fioti ve, “Mu ke sala nzila ya kubeluka ya nzutu; Mu ke sala nzila samu na *yayi*; mu ke sala nzila samu na *yina*.” Yandi tubaka, “Mu ke vwanda na beno!” Alleluia!

<sup>101</sup> Yawu yina Yandi tubaka na beto. “Mu ke vwanda na beno, ata mpe na kati ya beno, tii na nsuka ya yinza.” Kaka yina mu fwana tuba. Beno fwana ve kuswana na *yayi*, *yina*, to *yankaka*. Kana Yandi kele awa, yina ke sepelisa munu; kubeluka ya Kinzambi kele awa, Ngolo kele awa. Nionso Yandi vwandaka kuna, Yandi kele ntangu yayi, “Yesu Klisto mutindu mosi mazono, bubu yayi, mpe kukonda nsuka.” Na yina, beno lenda baka théologie ya beno mpe kudinda na yawu. Mpangi-bakala, mu ke kwikila Yesu Klisto mutindu mosi mazono, bubu yayi, mpe kukonda nsuka; Yandi tubaka, “Mu ke vwanda na beno, ata mpe na kati ya beno, tii na nsuka ya yinza.” Yinga.

<sup>102</sup> Mpe kuna bawu basikaka, mpe Yandi vwandaka na bawu. Ntangu yayi yandi tubaka... Oh, ya vwandaka na mwa kitunga ya mampa na zulu ya yintu ya yandi; ba me kudia nionso mpe nionso me mana. Bawu vwandaka diaka ve na kima mosi. Bawu kwendaka lala, na mwa nzala na nkokila yina. Kasi na suka yina landaka ntangu bawu vumbukaka, ya vwandaka na mampa na zulu ya ntoto bisika nionso.

<sup>103</sup> Ya kele mutindu yina Nzambi ke salaka bima; ke bika beno kukuma kaka na minuti ya nsuka, mpe kuna ke talisa beno yina Yandi lenda sala samu na yawu. Ya kieleka. Yandi ke zolaka



kusala mutindu yina. Yandi ke zolaka yawu. Yandi ke zolaka kuyitukisa bantu ya Yandi.

<sup>104</sup> Beno bakala ke zolaka kusala mutindu yina na kento ya beno. Beno ke vingila tii na kilumbu ya mbutukulu ya yandi, beno ke yitukisa yandi kaka, samu beno ke zolaka yandi.

<sup>105</sup> Ya kele samu na yina Nzambi ke bikaka beto kukuma na nsuka ya nzila na ntangu mosi, samu Yandi ke zolaka beto mpe ke zolaka kulakisa beto na mutindu ya Yandi ya mazulu mpe ya ngolo ya Yandi. Samu Yandi ke zolaka beto, ya kele samu na yina Yandi ke salaka yawu. Yinga. Yandi ke bikaka beto kukota na kisika yina beto me kubama samu na kusala kitambi ya nsuka, ya ke na ntangu yina Yandi ke kotaka na kisalu.

<sup>106</sup> Yandi bikaka bana ya ba-Hebreux kutambula na dibulu ya tiya, kasi ya vwandaka na Muntu ya yiya yina vwandaka ya kutelama kuna na ventilateur, samu ti yawu kusimba bawu ve. Beno me mona? Yandi kele ntangu nyonso kuna. Yandi ke kwendaka ntama ata fioti ve. Yandi ke vwandaka kaka pene-pene. “Wanzio ya Mfumu ke vwandaka pene-pene ya bayina ke bangaka Yandi.”

<sup>107</sup> Kuna, na nkokila yina, bawu lokotaka dimpa yina na suka yina landaka. Mu lenda mona ba-Israelite yina me luta na Mubu ya Mbwaki; yina me kuzwa mpulusu na nzila ya menga; bawu monaka Ngolo ya kubeluka ya Nzambi, to Ngolo ya bimangu yina me telama kati-kati ya Nzambi. . . mpe kati-kati ya Israel na Egypte; mpe ba komaka bambeni na manima ya yina.

<sup>108</sup> Mutindu cancer ya ntama me kwenda kimakulu, kimpofu me kwenda kimakulu, kufwa-makutu me kwenda kimakulu, diabete me kwenda kimakulu, bima nionso me dinda kuna na Menga ya Yesu Klisto. Wapi mutindu beno ke kuwa yawu? Oh!

<sup>109</sup> Beno ke tambula na bala-bala, mpe kiboba mosi ya muntu ya masawula ke tuba, “Ntangu yayi vingila fioti! Beno me ndima yawu ya kieleka?”

“Tuba na munu ve.” Amen. Oh, la la!

<sup>110</sup> Mu lenda mona bawu kuna, ke na kulokota mpe ke na kulokota, mpe ke na kudia, mpe ba vwandaka lutisa bantangu mosi ya nkembo. Kaka mutindu lukutakanu na mutindu ya ntama, ya Mpeve-Santu. Tala Mpeve ya Nzambi ke kulumuka na zulu ya mosi ya basantu, ke telemisa diboko; kuzwa yawu na kati ya ntima ya yandi mutindu yina, mpe kuboka, “Lukumu na Mfumu!” Kaka lukutakanu na mutindu ya ntama mutindu yayi. Yinga, tata. Ba vwandaka kanga yawu kaka na lweka mosi na yankaka, na kulutisaka ntangu mosi ya mbote.

<sup>111</sup> Ntangu yayi, dimpa yina sukaka ata fioti ve. Yawu landaka bawu na nzietolo nionso, samu na bawu. Ya kieleka. Mpe vwandaka kifwanisu ya kulunga ya pentecote na kati ya beto. Yina vwandaka na kimuntu. Dimpa yina sukaka ata fioti ve. Ya

vwandaka kaka dimpa ya mutindu mosi, tii kuna bawu kotaka na yinsi ya nsilulu. Ya kieleka? Beno mitangi ya Biblia zaba yawu. Mpe na yina ntangu beto . . .

<sup>112</sup> Ba biekaka Dibuundu na Kilumbu ya Pentecote, ntangu bakwikidi mataka kuna na zulu. “Mpe makelele mutindu mupepe ya ngolo, fulukaka na yinzo kisika bawu vwandaka ya kuvwanda.” Mpeve-Santu yina mosi kulumukaka kuna, ke kulumuka ntangu yayi. Yawu ke landila na kukwenda kubanda ntangu yina tii na nsuka ya ntangu. Ya ke landila na kukwenda. Ya kele dimpa ya beto. Ba vwandaka kudya na dimpa ya kimuntu; beto ke na kudia dimpa ya kimpeve.

<sup>113</sup> Yesu tubaka, “Mu kele Dimpa ya Luzingu yina me katuka na Nzambi, na Mazulu.”

<sup>114</sup> Bawu tubaka, “Batata ya beto kudiaka mana na ntoto ya kuyuma, na bamvula makumi yiya.”

Yandi tubaka, “Bawu kele, bawu nionso, kufwaka.” Yinga, tata.

<sup>115</sup> “Kasi yandi yina ke kudya nzutu ya Munu mpe ke kunwa Menga ya Munu, kele na Luzingu ya kukonda nsuka, mpe Mu ke vumbula yandi na bilumbu ya nsuka. Mu kele Dimpa ya Luzingu yina me katuka na Nzambi, na Mazulu. Kana muntu kudya Dimpa yayi, yandi ke kufwa ata fioti ve.” Yawu yina. Bawu vwandaka na yina ya kimuntu; beto ke na yina ya kimpeve. Oh, mu lendaka sobisa yawu na kima mosi ve. Kitoko mingi!

<sup>116</sup> “Oh,” beno ke tuba, “Mpangi Branham, beto nionso zaba ti nge ke fanatiki.” Mbote, mu ke sala yawu, mpe. Mu kele kilawu samu na Klisto. Nge kele kilawu ya nani? Nge lenda vwanda kilawu ya diabulu. Mbote mingi. Na yina, mu zola vwanda kilawu ya Klisto, beno ve? Mbote mingi.

<sup>117</sup> Beno tala, awa kele kima yankaka samu na yina me tala mana yina. Na ntangu bawu bandaka na kumeka yawu, bawu tubaka, “Ya ke na ntomo mutindu mafuta ya niosi.” Yinga, ya vwandaka kitoko. Mu lenda kaka kumona basantu ya ntama yayi ke lekita bikoba ya bawu mpe ke kudia. Ya vwandaka mbote.

<sup>118</sup> Beno me mekaka ntete *Yayi?* *Yayi* kele mbote, diaka. Ba me tuba, “Beno meka mpe beno tala, Mfumu kele mbote. Ya kele ntomo mutindu mafuta ya niosi na ditadi.” Mu ke salaka ntangu nionso mulabu yayi, bantangu mingi. Ti, ntangu David ya ntama, yina tubaka yayi na Psaume ya yandi, yandi tubaka, “Ya kele ntomo mutindu mafuta ya nionso na ditadi.”

<sup>119</sup> David, yina vwandaka muvungi, yandi vwandaka na mwa saki mosi, ba vwandaka lwata yawu na lweka, yandi vwandaka tula yawu ntangu nionso mafuta ya nionso. Mivungi ya ntama vwanda sala yawu, ntete, na—na Palestine. Mpe ntangu dimeme ya bawu—ya bawu ya kubela vwandaka bela, na yina, kima ya ntete beno zaba, yandi vwandaka kotisa diboko kuna mpe

vwandaka baka kitini ya bwiki yayi, mpe yandi ke baka yawu mpe ke kwanga yawu na zulu ya ditadi, na ditadi ya calcaire. Mpe dimeme ke zolaka mafuta ya nionso yina, na yina yandi ke lekita mafuta ya niosi yina na ditadi. Mpe ya kele na kima mosi na calcaire yina ke belusaka dimeme ya kubela.

<sup>120</sup> Mpe mu ke tuba na beno, beto kele na saki ya kufuluka na mafuta ya niosi awa na nkokila yayi, mpe beto ke tula yawu na zulu ya Ditadi, Klisto Yesu. Mpe dimeme ya kubela ke kwenda samu na kulekita, kieleka beno ke beluka. Ya kele kieleka, beno lekita kaka, beno lekita, beno lekita. Mpe na yina beno ke lekita mafuta ya nionsi, mbote, kieleka beno ke baka mwa calcaire. Ya kele kaka nionso kieleka. Ntangu yayi, beto ke sadila yawu ve na dibuundu. Beto ke sadila yawu na Klisto, kisika ya fwana vwanda. Ya kele kieleka. Samu ti, kubeluka ya nzutu kele na Klisto, amen, mutindu lusakumunu nyonso yankaka yina me kangama na mpulusu. Beno tala.

<sup>121</sup> Mpe kima yankaka. Ntangu yina ke banda na kubwa, Aaron kuzwaka lutumu ya kubasika samu na kulokota ba-omer mingi na yawu.

<sup>122</sup> Ntangu yayi, kana bawu mekaka na kubumba yawu samu na kilumbu ya zole, ya vwanda kupola. Mpe yawu yina beto ke mona mingi na kati ya bantu yina kele na Mpeve-Santu na nkokila yayi. Beno ke na kumeka na kubanza, “Mbote, bamvula makumi zole me luta, beto kuzwaka nsangu ya mbote. Beto kuzwaka—beto kuzwaka ntangu ya mbote.” Yinki beno ke na yawu na nkokila yayi? Yawu yina. Bawu . . .

<sup>123</sup> Ya vwanda kubwa konso nkokila. Ata mbala mosi ve ti ya me kondwaka, kaka na—na Saba. Ya kele kieleka. Mpe ntangu yayi Nzambi me tinda yawu, ya malu-malu, konso nkokila; konso kilumbu, konso ngunga, yawu vwanda kwisa.

<sup>124</sup> Beno tala, ba bumbaka ba-omer yayi. Yandi tubaka, “Ntangu yayi, tala, na ntangu beno ke kota na yinsi, mpe bana ya beno ke banda na kuyufula bakyuvu samu na yayi. . .” Yandi tubaka, “Konso nganga-Nzambi yina ke kota na kinganga-Nzambi, na manima yandi me kuzwa muswa ya kukuma na kisika ya Santu, mpe nionso yina, nganga-Nzambi, yina ba me bieka, na yina yandi kuzwaka muswa ya kukota mpe ke kudia kitini ya mana ya ntete yina kubwaka na mbandukulu.” Mana ya ntete yina kubwaka, ba lokotaka yawu mpe ba tulaka yawu na kati ya omer, mpe bumbaka yawu, mpe ba kebaka yawu samu na kinganga-Nzambi.

<sup>125</sup> Ntangu yayi beno ke tuba, “Mpangi Branham, wapi kele kifwanisu ya yawu bubu yayi?”

<sup>126</sup> Kasi, beto kele kinganga-Nzambi. “Beno kele kinganga-Nzambi ya kimfumu, yinsi ya santu, bantu ya kuswaswana, na kupesaka minkayulu ya kimpeve na Nzambi, bambuma ya bikoba ya beno ke vutula matondo na Nkumbu ya Yandi.” Amen.

Yawu yina. Ntangu yayi, na yina, na Kilumbu ya Pantekote, ntangu Mpeve-Santu kulumukaka; mana ya beto.

<sup>127</sup> Ntangu yayi, nganga-Nzambi nyonso na ntangu yina kuna, na nsi ya Ngwisani ya Ntama, ntangu bawu vwandaka kwiza na kuvwanda nganga-Nzambi, bawu zabaka ti bawu ke kudia mana ya ntete; yina ba me sala ve, kima yina ba me sala na bantu yina me fwanana na yawu. Kasi ba zolaka kuzwa ndambu ya ntete.

<sup>128</sup> Mbote, na Kilumbu ya Pantekote, ntangu mana ya beto bandaka na kubwa, Mpeve-Santu kwizaka mutindu mupepe ya ngolo. Awa vwandaka nkonga ya bantu, ya kifuluka na lukumu, nkama mosi na makumi zole, na yinzo ya zulu; bielo ya kukanga, banela ya kukulumusa, ba vwandaka ya kuvwanda kuna, ba vwandaka vingila nsilulu. Yinga, bawu vwandaka na Yesu, ya kieleka. Bawu zabaka ngolo ya Yandi, mpe nionso yina, kasi bawu vwandaka vingila nsilulu.

<sup>129</sup> Yawu yina beto ke zola na nkokila yayi. Kuvwanda . . . Kana kimvuka yayi ya bantu lendaka vwanda na ngwisani mosi, mutindu bawu vwandaka na nkokila yina, kima mosi yina zolaka salama diaka na nkokila yayi, kaka awa na kati ya kivinga yayi, na Louisville, na Kentucky, yina salamaka na Kilumbu ya Pentecote. Ya kieleka. Oh, ya kieleka, ya zolaka vwanda na bantu ya masawula ya mutindu mosi awa na Louisville yina ba kuzwaka kuna. Kasi, bawu nionso vwandaka na kisika mosi, na ntima mosi. Mpe na kintulumukina . . .

<sup>130</sup> Longi mosi kwisaka, mpe yandi kuzwaka mukanda mosi, mpe bawu tulaka bankumbu ya bawu mpe kuzwaka diboko ya ngwisani, mpe kotaka na ngwisani ya dibuundu? Ya fwana vwanda mutindu yina bubu yayi, kasi ya vwandaka ve mutindu yina na ntangu yina. Ya kele mutindu yina ba-Protestant ke salaka yawu. Katolika ke belama na autel mpe ke baka kominyo ya yandi ya ntete; ke basisa ludimi ya yandi, ke baka hostie; mpe nganga-nzambi ke kunwa vinu. Na manima yawu yina yandi ke kuma.

<sup>131</sup> Kasi, mpangi-bakala, “Na Kilumbu ya Pentecote, bawu vwandaka na ngwisani, na kisika mosi, mpe na kintulumukina ya vwandaka na makelele katukaka na Mazulu,” muntu vwandaka ve na kima ya kusala na Yawu, “mutindu mupepe ya ngolo. Yawu fulukaka na yinzo nionso kisika bawu vwandaka.” Ngolo ya Nzambi kulumukaka na zulu ya bawu! Bawu yina me basika na bala-bala, na kusalaka mambu mutindu nkonga ya bilawu; mutindu bawu salaka kuna ntangu bawu zabukaka Mubu ya Mbwaki. Ya kieleka? Ba vwandaka boka. Ba vwandaka ya kuzatuka. Ba vwandaka titiba. Ba vwandaka tuba na bikoba ya bawu ke kekamana.

<sup>132</sup> Bawu, oh, wapi mutindu ya kuzatuka yayi, beno . . . tii bantu, dibuundu ya kifuluka na lukumu, yandi telamaka kuna mpe tubaka, “Bantu yayi me lawuka vinu ya malu-malu.

133 Alleluia! Beno ke bokila munu “exalté,” na mutindu nyonso, na yina beno fwana sala mbote na kubanda ntangu yayi. Mbote mingi.

134 Beno tala, ba vwandaka ya kifuluka na Vinu ya malu-malu, ya kele kieleka, Vinu yina me katuka na Nzambi, na Mazulu. Beno me monaka ntete muntu ya kulawuka malafu? Yandi kele kaka na zola na muntu nyonso, beno me mona. Yandi ke kipe ve. Ya kele mutindu muntu kele ntangu yandi me lawuka na Mpeve. Biblia me tuba, “Beno vwanda ve ya kulawuka na malafu ya ngolo, ya kulutila, kasi beno vwanda ya kulawuka na Mpeve.” Mpeve ya Nzambi ke lawusa beno mingi, beno ke zimbana bambeni ya beno nionso, mpe nionso yina. Muntu nionso kele na zola na beno. Yandi ke kipe ve nani kele pene-pene ya beno. Beno kele muntu ya kulutila nene na yinsi na ntangu yina.

135 Mu ke kipe ve kana mfinangani ya beno, yina me vwanda na lweka ya beno, ke kwendaka na yinzo-Nzambi mosi ya lukumu; beno bika kaka Mpeve-Santu kukulumuka na zulu ya beno kilumbu mosi, beno tala yina ke salama. Beno baka kwiti, ya mbote, ya kieleka, beno tala yina ke salama. Beno ke tuba, “Mpangi-kento, mu me kuzwa Yawu! Nge zola Yawu, mpe!” Ya kele kieleka. Yinga, tata, kima mosi ke salama.

136 Kuna bawu vwandaka, bawu nyonso ya kulawuka na Vinu ya malu-malu. Mpe, beno kuwa, ndambu ya beno bampangi ya bakento awa, beno me zaba ti mwense ya kusakumuka Marie vwandaka kuna na kati? Ntangu yayi, yandi lombaka ti yandi mata kuna. Mama ya Yesu Klisto zolaka mata kuna mpe kuvwanda na kati ya nkonga ya bantu yayi, ya kulawuka mingi na Mpeve ti yandi vwandaka tekita mutindu ti yandi me lawuka wiski to kima mosi.

137 Mpe beno ke banza ti beno ke kwenda na Mazulu samu beno ke lutaka na yinzo-Nzambi mpe buku ya beno na yisi ya diboko ya beno, mpe beno ke kwenda kuna konso Lumingu na suka, mpe ngunga ke bula, mpe beno ke vwanda kuna mpe beno kuwa fioti . . . mpe beno ke vutuka? Beno ke kwenda kuna ata fioti ve.

138 Beno fwana landa nzila yina, samu yina kele nzila kaka mosi Nzambi me sala, yina Yandi me kuzwaka ntete ve. Mpe beno ke tambula na yawu, to beno ke vwanda Kuna ve. Mu kele zuzi ya beno ve, kasi mu ke longa Nsangu ya mbote. Ya keleka ya kele Kieleka. Mwense ya kusakumuka vwandaka kieleka kuna, salaka kaka mutindu zoba mutindu bayankaka ya bawu salaka, ya kulawuka mutindu bayankaka ya bawu. Babakala yayi mpe bakento yayi, mosi na mosi ya bawu, vwandaka ya kifuluka na Vinu ya malu-malu. Kana Nzambi me sobaka ntete ploglame yina, beno talisa munu na Masonuku kisika ba me tuba yawu; ya kele ve kuna. Ve, tata. Ya me vwanda kaka mutindu yina tii na nsuka ya nsungi, mutindu yina, tii na nsuka ya Biblia, mpe ya ke vwanda kima mutindu mosi ntangu Yesu ke kwisa.

139 Beno tala! Na yina bawu vwandaka ya kulawuka na Vinu ya malu-malu yina, beno tala, beto ke mona kana Nzambi bumbaka omer mosi samu na beno nionso. Mbote mingi.

140 Bawu nyonso vwandaka ya kutelama kuna, mpe mwa mulongi ya koyi-koyi na nkumbu ya Pierre, “mwa ditadi,” yandi vwandaka na boma mingi ya kisika ya yandi tii yandi mangaka Yesu, mpe yandi basikaka mbangu mpe sambilaka tii yandi kuzwaka mvutu, mpe yandi zolaka vukana na bayankaka yina vukanaka. Yandi telamaka na zulu ya sanduku ya sabuni to kima mosi, tubaka, “Oh, beno bantu ya Judée, mpe beno bayina ke zingaka na Jérusalem!” Yina vwandaka badokotolo, ba-Docteur ya Théologie. Oh, yandi tubaka, “Beno bantu yina . . . mpe bantu ya Israel, mpe beno yina ke zingaka na Jérusalem, mpe nionso yina, bika ti beno zaba yayi. Bayayi kele ve ya kulawuka na malafu, mutindu beno ke banza, samu ti ya kele ngunga ya yivwa ya suka. Kasi yayi kele yina . . .”

141 Kana yayi kele Yawu ve, mu zola kubumba yayi tii Yawu ke kwiza. Ya kele kima mosi.

142 Yandi tubaka, “Yayi kele yina profete Joël kuzonzaka, ‘Ya ke salama ti na bilumbu ya nsuka, Nzambi tubaka, Mu ke mwangisa Mpeve ya Munu na zulu ya bantu nionso; bana ya beno ya babakala mpe bana ya beno ya bakento ke pesa profesi; mpe na zulu ya bisadi ya Munu ya babakala mpe bisadi ya bakento Mu ke mwangisa Mpeve ya Munu, mpe bawu ke pesa profesi; mpe Mu ke talisa bidimbu na mazulu, mpe na ntoto; mpe makunzi ya tiya, mpe mulinga, mpe mupepe ya tiya; mpe ya ke salama, ntete kilumbu ya nene mpe ya mpasi ya Mfumu ke kwisa, muntu nyonso yina ke bokila Nkumbu ya Mfumu ke kuzwa mpulusu.’”

143 Nkonga yina ya banganga-Nzambi ya nkumbu, ya luvunu, na bamvwela ya yinda, tubaka, “Yinki beto lenda sala samu na kuzwa mpulusu?”

144 Pierre tubaka, “Beno balula ntima, mosi na mosi ya beno, mpe beno baka mbotika na Nkumbu ya Yesu Klisto samu na mulemvo ya masumu ya beno, mpe beno ke kuzwa dikabu ya Mpeve-Santu.” Bantangu yikwa ya ke zinga? “Samu nsilulu kele samu na beno, mpe bana ya beno, mpe samu na bayina kele ntama, mpe mingi mutindu Mfumu Nzambi ya beto ke bokila.”

145 Na yina, muntu nionso yina me balula ntima mpe me botama na Nkumbu ya Yesu Klisto, mpe Nzambi ke pesa yandi mbotika ya Mpeve-Santu, ve kima yina ke monana mutindu mana ya ntete, kasi, yandi ke kudia kaka ve kitini ya mana ya ntete, kasi yandi ke kuzwa ntima ya kufuluka na Mpeve-Santu ya mutindu mosi.

146 Beno lenda tuba, “Mwa ngolo fioti kuna.” Mu zaba ti mu ke tuba ngolo fioti samu na yawu, kasi mu lenda ve kukipekisa samu na yawu. Beno tala, beno tala. Mu ke nganina beno ve. Mu

banza ti mu ke sala makelele samu na yawu. Kasi, oh, kana beno ke kuwa mutindu mu me kuwa, beno ke tuba ngolo mingi, mpe.

147 Beno tala, oh, ntima ya kufuluka na mana yina kubwaka na mbandukulu; Mpeve-Santu mosi kulumukaka na ntangu yina, ke na kubwa na ntangu yayi. Mpe wapi kisika Yawu ke kwenda? “Samu na beno, samu na bana ya beno, bayina kele ntama,” na Louisville, na Kentucky, “mpe bayina nionso Mfumu Nzambi ya beto ke bokila, ke kuzwa kima ya mutindu mosi yina beto me kuzwa awa.”

148 Yawu yina Yandi tubaka. Nzambi sakumunaka yawu. Yandi longaka yawu. Mpeve-Santu nataka Yawu; mu me kuzwa Yawu; yina ke sukisa yawu. Amen. Yina, yina me lunga samu na munu. Mu bakaka Yandi na Ndinga ya Yandi; Yandi salaka yawu. Kana beno zola Yawu, beno lenda kuzwa Yawu, mpe. Ya kele kieleka.

149 Na yina beno basika na mutindu yina ya lufwa, mpe beno vumbuka, mpe ya ke ningisa beno mutindu yina mpe ya ke vumbula beno. Mpe kima ya ntete, beno ke tala pene-pene ya beno mpe nyonso ke monana ya kuswaswana samu na beno. Bakala yina beno zolaka ve kutuba na yandi, beno ke kwenda nswalu na kukwenda kutuba na yandi; yinga, tata, beno fwana tuba na yandi, yimeni. Oh, bima yina nionso, beno baka basadilu yayi ya ntama samu na bapiné, mpe bima nionso. . . bima yina beno bakaka na hôtél na ntangu yina. Kitambala yina ya ntama ya mesa yina beno vingaka na yawu nsomo yina beno bakaka na mesa; beno ke sala nswalu samu na kuvutula yawu. Kieleka beno ke sala yawu. Yinga, tata. Ya ke sala beno kivangu ya malu-malu kati na Klisto Yesu. Ntangu yayi beno tala Marie. Oh, la la!

Beto fwana sala nswalu. Beto ke na kukwenda na ntwala.

150 Awa bawu me kwenda, na ntoto ya kuyuma ntangu yayi, na manima ya lukutakanu ya mutindu ya ntama. Ntangu yayi bawu kele na nzietolo ya bawu. Ya kele ve diambu ya ngitukulu ti ba twadisaka bawu mbala mosi na Ntoto ya kuyuma ya Sin, mbala mosi na ntoto ya kuyuma, mbala mosi kuna na yinto ya maza ya ndudi? Beno lenda banza ti Nzambi vwandaka nata bana ya Yandi, kaka na manima bawu me kuzwa mpulusu mpe me fuluka na Mpeve-Santu, na bayinto ya maza ya ndudi? Kieleka. Yandi zolaka kulakisa zola ya Yandi na bawu dyaka. Ya kele kieleka. Bawu kumaka kuna.

151 Beno zaba, ntangu beno ke kuzwa Mpeve-Santu, beno ke kutana na masakuba mingi. “Muntu ya mbote ke monaka mpasi mingi, kasi Nzambi ke vulusaka yandi ntangu nionso.” Nzambi ke nata beno kuna, samu na kukutana na yawu, na yina Yandi lenda talisa na beno ngolo ya Yandi mpe mambote ya Yandi.

152 Mutindu mu kuwaka disolo ya mvungi ya mameme na Jérusalem, yina bukaka dikulu ya dimeme ya yandi. Bawu tubaka, “Samu na yinki, nge mvungi ya nkú. Samu na yinki nge me buka dikulu ya mameme?”

153 Yandi tubaka, “Mbote, yandi vwandaka sala ve mutindu yandi vwandaka zola munu. Na yina mu banzaka ti mu lendaka buka dikulu ya yandi, na yina mu lendaka pesa yandi bukebi ya kuswaswana, mpe kuna yandi ke zola munu kubanda kuna.”

154 Bantangu yankaka Nzambi fwana tula beno na mbeto, na kimbevo, ti dokotolo ke tuba beno ke kufwa. Nzambi lenda pesa beno mwa lusansu ya kuswaswana samu beno kuzola Yandi mwa mingi dyaka. Ya kele kieleka.

Bayankaka na nzila ya bamasa, bayankaka na  
nzila ya masa,  
Bayankaka na nzila ya kumekama ya nene,  
kasi beto nionso ke luta na Menga;  
Yesu ke twadisaka Dibuundu ya Yandi.

155 Ntangu yayi, ntangu bawu vwandaka kuna, mpe bamasa vwandaka ndudi mpe bawu lendaka kunwa ve, Nzambi kukubikaka nzila. Mwa yinti mosi vwandaka ningana kuna na kumu, Moise zengaka yawu mpe losaka yawu na kati ya masa, sobaka nionso; masa kumaka mbote, ya lembami.

156 Ntangu yayi ntangu beno ke kuma na ntwala ya mosi ya bamasa ya beno ya ndudi, to kima yankaka mutindu yina, ya kele na yinti, na nkokila yayi, na nzonzolo ya kimpeve, ya kunamika na zulu ya Golgotha, to na yinza, na nkokila yayi, yina ke lembika bamasa nionso ya ndudi kisika nionso ya ke twadisa beno. Ya kieleka. Calvaire ke lembika zingulu nionso. Na bantangu mingi beto ke kotaka na bisika ya mpasi, mpe beto ke kukiyufula bakyuvu. Na yina mu ke kanga meso ya munu na ntangu mosi, mpe mu ke banza, “Kuna na Golgotha, kisika Mukudi ya munu tiamunaka menga mpe kufwaka samu na luzingu ya munu,” na yina kumekama ya munu ke monana fioti mingi. Mu ke tula yawu kaka na lweka mpe mu ke kwenda na ntwala. Ya ke lembika. Ya ke lembika zingulu nionso mu me kuzwaka ntete. Yandi lembika yawu ntangu nionso, ntangu mu ke kuna na bamasa ya munu ya Mara.

157 Ntangu yayi, beto ke zola kukanga bawu awa na ntoto ya kuyuma, na manima ya bidimbu nionso yayi ya nene mpe mambu ya ngitukulu. Reveil kumaka swi. Mpe kima ya ntete beno zaba, ntangu reveil kumaka swi, na yina, bawu zimbanaka bimangu nionso.

158 Ya kele ve kaka mutindu bantu ke na kusalaka bubu yayi? Ba ke zimbana yina Nzambi salaka na mvula me luta. Yina Nzambi salaka na lukutakanu awa na lukolo ya bambuta, beno me zimbana yawu nionso. Beno me mona? Yina Nzambi me sala, beto ke zimbana yawu kaka.

159 Ntangu yayi, beno tala, mpe samu ti bawu bandaka na kuswana mosi na yankaka, “Mbote, ya kieleka, na manima ya nionso, mu kele Methodiste. Dibuundu ya beto kele ya kulutula nene.” “Mu kele Baptiste, mpe mu ke tuba na beno malu-malu



yayi, beto ke kwikilaka na lukengolo ya Seko, mpe beto kele na Yawu. Beno yankaka kele ve na malongi, na mutindu nionso.” Ya ke ntangu yina beno ke kotaka na mpasi, mpe yinto ya masa ya beno me kangama. Ya kieleka. Ya kieleka.

<sup>160</sup> Ya kele ntangu yina, na ntoto ya kuyuma, ntangu yandi ke zinga kuna na ntoto ya kuyuma, yandi ke banda na kuniunguta, kuniunguta mpe kubokuta. “Oh, mu ke tuba na nge. Mu ke tuba na nge, ntangu pasteur yina ya kiboba vwandaka awa, mulongi yina ya kiboba yina longaka nsambulu ya ntama mutindu yina, mu—mu zaba ve kana yandi vwandaka na kieleka to ve. Mu ke tuba na nge, yandi—yandi salaka ti mama ya munu kudasuka, na nkokila mosi, ntangu yandi vutukaka na yinzo. Mpe mu ke tuba na nge, yandi vwandaka me vwalangana, kaka.” Yandi zolaka vwanda mutindu yina. Ya kele kieleka. “Oh, mu zaba ve kana mu ke landila na kuwa Yawu diaka, to ve.” Mpe ya kele ntangu yina yinto ya masa ya beno me kangama. Ya kieleka. Ya kele ntangu yina beno ke kota na ntoto ya kuyuma.

<sup>161</sup> Bawu bandaka na kuniunguta. Bawu tubaka, “Mioyo ya beto—ya beto ke sepela ve na dimpa yayi.” Na manima ba bikaka ba-ayi mpe matungulu ya Egypte, mpe ba vwandaka kudia madia ya Bawanzio, mpe ba vwandaka niunguta diaka. Ya kele ve mutindu dibuundu? Ntangu yayi mu ke kuma na bantu ya busantu ntangu yayi, beno nionso; yinga, beno nionso. Ba vwandaka kudia madia ya Bawanzio, mpe na manima bawu tubaka, “Mu ke zola ti beto vutuka na Egypte, samu na kuzwa diaka ba-ayi.”

<sup>162</sup> “Clayton McMichen mpe Wildcats ya yandi ke vwanda na nganda na nkokila yayi. Kana mu kotaka ve na dibuundu yayi ya ntama, mu zolaka kwenda kuna.” Beno zolaka kwenda kaka kuna. Kisika bimvwama ya beno kele, kuna diaka kele ntima ya beno. Beno me kuzwaka kima mosi ve na kubanda. Ya kele kieleka. Ya kele kieleka. “Oh, mu ke zola kusala *yayi*, to kusala *yina*.” Yawu yina, ntangu nyonso kubokuta.

<sup>163</sup> Mpe bawu bikaka bamaza ya poto-poto ya Égypte, samu na kunwa bamasa ya kukondwa mvindu na Ditadi ya Bansungi, mpe vwandaka bokuta samu na Yawu. Bawu bikaka kisika yina minganga ya nene ya Egypte, ya lunangu, bantu ya lunangu ya nene mpe nionso yina, samu na kuvwanda na Munganga ya Nene. Bawu bikaka kisika yina ba vwandaka tuba, ti, “Bilumbu ya bimangu me luta,” samu na kuvwanda na bantu yina vwandaka na bidimbu mpe mambu ya ngitukulu ke landa bawu, mpe vwandaka bokuta dyaka. Oh, la la! Yinga, tata. Kuna, ya kieleka, ba-Egyptien, bawu vwandaka Bantu ya makanda ya madidi, yina ke kipaka diambu mosi ve. Bawu vwandaka kwikila ve na kima ya mutindu yina mutindu bimangu.

<sup>164</sup> Na yina, bawu vwandaka kisika yina bawu vwandaka na Dikunzi ya Tiya pene-pene ya bawu. Beto me kuzwa Yawu na

nkokila yayi. Bawu vwandaka kuna kisika wapi bawu vwandaka na kiese na camp, ba vwandaka boka, ba vwandaka sala bimangu, mpe nionso yina, mpe na manima bawu vwandaka bokuta samu na yawu. Ya kele samu na yina masa yumaka, ya kele samu na yina bawu vwandaka ve na kima ya kudia to ya kunwa, samu bawu vwandaka kuniunguta.

<sup>165</sup> Mpe yawu yina kele dyambu na mabuundu na nziunga ya Louisville, na nokokila yayi; ba ke na kuniunguta, ba ke na kubokutaka. Kyadi! Beno vutukila mukaba. Yawu yina.

<sup>166</sup> “Na yina nani kele muntu yayi, Moïse? Samu na yinki beto me kuwa, beto me kuwa mulongi ya exalté yayi, kaka? Yinki beto ke sala awa?” Mpe yinto ya masa ya bawu yumaka.

<sup>167</sup> Mu ke banza na Moïse, muntu yina ya nene. Ba longaka yandi na ndwenga nionso ya Egypte. Beto tala yandi kaka na mwa ntangu fioti. Beto baka Moïse, na mwa ntangu fioti. Beno tala muntu yina. Yandi vwandaka . . .

<sup>168</sup> Bantu ya Egypte, ba vwandaka ntama mingi na beto bubu yayi, samu na yina me tala mayele ya beto ya munganga. Bawu vwandaka ntama mingi na zulu ya beto. Bima mingi bawu lendaka sala ti beto lendaka sala ve.

<sup>169</sup> Mpe Moïse vwandaka na nkisi samu na nionso. Mpe ntangu yandi vwandaka kuna, beno banza, Moïse vwandaka na bantu mafuku zole. Yandi vwandaka na bana ya fyoti. Yandi vwandaka na babakala ya kukula, bakento ya kukula. Yandi vwandaka na bikata, mpe mpofo. Ba-bébé butukaka, mafunda ya bawu, na sabala mosi. Mpe Moïse, Docteur Moïse, vwandaka kuna na ntoto ya kuyuma na bantu yayi nionso. Mu ke zola kutala na pharmacie ya yandi, beno ve? Mu ke zola kutala yina vwandaka na pharmacie ya Docteur Moïse. Beto tala kaka fioti na pharmacie ya yandi mpe beto tala yina yandi vwandaka na yawu.

<sup>170</sup> “Moïse, samu na yinki, yinki nge me kuzwa kuna, Moïse?” Na yina, beto ke mona ti na nzyetolo yayi ya bamvula makumi yiya, me butuka ba-bébé mafuku zole. Ya kieleka. “Yinki nge me sadila, Moïse? Yinki nge me sadila samu na bimbevo yayi nionso mpe bampasi mpe ba-cancer, mpe kimpofo, mpe kufwa makutu, mpe kimbevo ya bubaba? Oh, bawu ke tuba na munu, ti na ntangu beno me basika na ntoto ya kuyuma, ata muntu mosi ve vwandaka ya kulemba na kati ya bawu.” Oh, badokotolo yankaka ke zola kutala kuna, na pharmacie yina?

<sup>171</sup> “Mpe kima yankaka, Moïse, yinki nge vwandaka mwangisa na zulu ya bantu yina, ti bilele ya bawu kubeba ve? Basapatu ya bawu bebaka ata fioti ve, ntangu ba vwandaka tambula na zulu ya matadi yina.” Kana beno me vwandaka ntete kuna, beno zaba yinki mutindu ntoto ya kuyuma ke vwandaka, ba ke bebisaka makulu zole ya basapatu na bilumbu tatu. Mpe ata mbala mosi

ve ti kitini ya cuir kubebaka, na bamvula makumi yiya. “Moise, yinki vwandaka na pharmacie ya nge?”

172 Beto tala na kati ya yawu. Mu ke mona yandi, “Mu ke na mukanda mosi ya dokotolo, ‘Mu kele Mfumu yina ke belusa nge.’” Yina ke sukisa diambu. Amen.

173 Ba tubaka, “Oh, Moise, tata ya munu kwendaka kuna, yandi me kubwa mpe me bukana dikulu ya yandi. Yinki nge ke na yawu samu na yandi?”

174 “Bika mu tala mpe mu mona. ‘Kana nge ke tumama na ndinga ya Munu, kana nge ke sala nionso yina Mu ke tuma na nge, Mu ke tula ata mosi ve ya bimbevo yayi na zulu ya nge, mutindu ba-Egyptien, samu Mu kele Mfumu yina ke belulaka nge.’ Beno tuba na yandi mutindu yina.” Yandi me beluka. Amen. Ya kieleka.

“Oh, yandi kele ya kubela mingi! Bébé ya munu kele na mpasi na kivumu, to pneumonie, yandi ke bela mingi! Dokotolo Moise, yinki mu lenda sala?”

175 “Bika mu tala yina mu ke na yawu. ‘Mu kele Mfumu yina ke belusa nge.’” Yina ke sukisa dyambu. Amen. Bawu vwandaka kwenda. Ya kieleka. Ba vwandaka landila nzila ya bawu, na kusepelaka. Yawu yina kaka yandi ke na yawu nsatu, “Mu kele Mfumu yina ke belusa nge.”

176 Ya ke na bankama sambanu na ndambu, ya bansilulu samu na kubeluka ya Kinzambi, na Ngwisani ya Malu-malu kaka, mpe kasi beto ke na kutulaka ntembe na Nzambi, na nkokila yayi. Yinki ke vwanda Lufundusu samu na beto? Kieleka.

177 “Mu kele Mfumu yina ke belusa nge.” Yinga, tata. Yawu yina Moise vwandaka na yawu, Docteur Moise vwandaka na sphère ya yandi, na yandi. . . na pharmacie ya yandi, yayi vwandaka, “Mu kele Mfumu yina ke belusa nge.” Na yina Yandi belusaka bimbevo nionso, mpe kebaka bawu na mutindu ya kulunga, mpe nataka bawu kuna na ntoto ya kuyuma, na yinsi ya nsilulu. Oh, la la!

178 Bawu bikaka minganga nionso yina ya nene, ya lufundusu, samu na kuvwanda na Munganga yayi ya Nene. Bawu bikaka nkonga ya bantu yina vwandaka madidi, ya ngaanda, mpe yina vwandaka kipe diambu mosi ve, na kutubaka, “Ya vwandaka ve na kima mutindu bimangu.” Mpe kaka awa, Dikunzi ya Tiya vwandaka na zulu ya bawu. Bantu vwandaka beluka. Nionso, mpe bima nionso yina ba vwandaka na yawu nsatu, ba vwandaka pesa yawu mbala mosi na bawu, mpe kasi ba vwandaka bokuta ntangu bawu kondwaka masa. Kasi na yina na lemvo ya nene ya Nzambi, na nyonso yina. . .

179 Mutindu beno kele awa na Louisville na nkokila yayi, na kati-kati ya makelele nyonso yayi, “Bilumbu ya bimangu me luta. Kimvuka ya Minganga ke meka na kukanga kubeluka ya

Kinzambi, na yinsi ya muvimba.” Beno ke sukisa yawu ata fioti ve. Mutindu mosi beno fwana suka na ntangu yayi. Beno lenda ve kusukisa yawu ti beno lenda ve kusukisa mwini. Ya kieleka.

<sup>180</sup> Awa mwa bamvula me luta, ntangu mu bandaka ntete na Jeffersonville, mu vwandaka longa kubeluka ya Kinzambi. Ba vwandaka zaba kima mosi diaka ve, na kutala, bamvula mingi. Ya vwandaka kima mosi ya mpasi. Kasi, mpangi-bakala, na nkokila yayi keke na mafuku ya bawu, bisika nyonso, ke na kuboka. Beno ke meka na kusukisa yawu? Beno lenda ve. “Munu Mfumu me kuna yawu; Mu ke losila yawu masa, na mwini mpe na mpimpa, ti muntu mosi ve kubotula yawu na diboko ya Munu.”

<sup>181</sup> Awa ntama mingi ve, mu vwanda tala mwa banswimi na zulu ya Kiteki ya Kimpwanza. Bawu vwandaka me tandama kuna. Mwa bivangu yayi ya fioti vwandaka me tandama kuna bisika nionso, na nsi ya nsemo. Mpe mu tubaka, “Yinki yawu salaka?” mu vwanda tuba na ntwadisi.

<sup>182</sup> Yandi tubaka, “Ba vwanda bula bayintu ya bawu, mazono na nkokila, na ntangu ya kitembo yina. Bawu kwisaka na kati ya nsemo, mpe nsemo zolaka nata bawu na kisika ya lukengolo, kasi bawu vwandaka meka na kufwa nsemo. Mpe bawu vwandaka bula bayintu ya bawu kuna, na kumekaka na kufwa nsemo.”

<sup>183</sup> Mu tubaka, “Nkembo na Nzambi!” Mu banza ti yandi banzaka ti mu vwandaka kilawu. Mu tubaka, “Yina ke bambuka munu bantu yayi ke meka na kufwa kubeluka ya Kinzambi mpe Ngolo ya mvumbukulu ya Yesu Klisto.” Beno ke bula bayintu ya beno kuna; beno ke kufwa yawu ata fioti ve. Beno ndima yawu kaka, mpe beno pumbuka na lukengolo, na kati ya yawu. Ya kieleka. Amen.

<sup>184</sup> “Tuba na ditadi, Moise,” Nzambi tubaka na Moise, “mpe ya ke basisa masa ya yandi, ke basisa masa ya Yandi.”

<sup>185</sup> Awa ntama mingi ve, mu vwanda tala foto mosi na kati ya musée mosi, ya ditadi yayi ba me bula. Mpe ya monanaka mutindu mwa kitini ya filet ya masa, pene ya bunene ya sindani vwandaka basika kuna. Mu banzaka, “Tala mutindu ba-artiste yayi lendaka monana ya buzoba!” Oh, mpangi-bakala, mu lendaka yumisa masa yina kana mu vwandaka na mpwila ya masa. Yinga, tata.

<sup>186</sup> Beno zaba nani Moise pesaka masa na Ditadi yina? Yandi pesaka masa na bantu na zulu ya mafuku zole, na ngaanda ya baniama nionso. Yawu lombaka ba-litre difunda mosi na makumi tanu na mosi na bankama yiya na muniti mosi, samu na ku—kunwisa, bawu. Alleluia!

<sup>187</sup> Yina ke bambuka munu nsambulu ya bantu yankaka. Beno ke kaka na nsambulu ya mingi samu na kukwenda na lukolo ya Lumingu na suka, mpe kuzwa kaka mwa matanga samu na kulembika fioti bikoba ya beno.

188 Mu ke zolaka kuvwanda na Yinto kisika masa ke basika mingi, alleluia, ya kulutila mingi samu mu zinga tii kuna na Seko nionso. Alleluia! Mu ke na kiese ti mu me basika na kisika yayi ya ntama ya madidi; samu na kukwenda kisika masa ke basikaka ntangu nionso. Yinga, tata.

189 Bantu kele kaka na nsambulu ya mingi samu na kukumisa bawu bantu ya mawa. “Mbote, mu lenda bikana ve ya kuvwanda na zulu ya minuti kumi. Oh, la la, mawa, bantangu yikwa ke baka mulongi yayi?” Mutindu mudindu kele mpulusu ya beno? Ya kele kieleka.

190 Beno ke kwenda kuna na Lumingu na suka, mpe beno ke tuba, “Mbote, mu ke kwenda kuna mpe mu ke kuwa yina ba ke tuba.” Mpe beno ke kuzwa mwa matanga ya fioti mpe beno ke vutuka, mpe yawu yina kaka beno me kuzwa.

191 Mpangi-bakala, mu ke tuba na beno kima mosi, ntangu Moise bulaka Ditadi yina, yawu pesaka masa na ntoto ya kuyuma nionso. Amen. Yinga, tata. Kima kaka mosi, nionso yina bawu vwandaka na yawu nsatu, bawu zolaka kaka kukulumuka mpe kunwa, kunwa, kunwa tii kuna bawu vwandaka ya kifuluka. Kasi, masa vwandaka basika diaka, pene ya ba-litre difunda mosi na makumi tanu na mosi na bankama yiya na muniti mosi. Beno tanga ntalu ya yawu, bantu yikwa, difuku mosi ya bantu, mafuku zole ya bantu lendaka kunwa, na muniti mosi; bantu yina vwandaka na mpwila, na nganda ya bakamela, mpe baniamama, mpe bima yina ba vwandaka na yawu. Mpe Biblia ke tuba, “Yawu basikaka kulutila mingi.” Ya vwandaka basika na kusalaka makelele, na ntoto ya kuyuma.

Ya kele mutindu Yesu Klisto ke pesaka Mpeve-Santu.

192 Ve kaka mwa fyoti, samu na kutuba, “Mbote, mu ke kwikila ti mu ke kwenda mpe mu ke kota na dibuundu.” Oh, la la! “Oh, mu lenda ve kukanga ntima na makelele yina. Ya ke pesaka munu buyi-buyi.” Kana beno ke kufwa, beno ke kufwa na madidi kana beno me kwenda na Mazulu, samu, mpangi-bakala, beno ke kuwa makelele na ntangu beno ke kuma Kuna. Biblia ke tuba ti bawu ke bokaka “alleluia,” kilumbu mpe mpimpa; kilumbu nyonso, samu ti ya kele ve na mpimpa. Ya kele kieleka. Kieleka beno ke kufwa ntangu beno ke kuma na Mazulu, kilumbu ya zole na zulu Kuna. Yinga, tata. Mbote, beno ke . . . yina beno salaka, beno kwendaka kaka mpe beno me lekita masa, mwa fioti.

193 Samu na yinki beno ke vwanda ve na yinto yina ke basisa masa, mpe kubika yawu kutiamuka tii ya ke sukula beno kuna na . . . alleluia, na kati-kati, mpe tii kuna beno ke zimbana beno mosi mpe beno ke zaba ve kisika beno kele. [Kisika ya mpamba na bande—Mu.] Ya kele mutindu yina beno zola kukuma.

194 Mu vwandaka tuba na noko ya munu, mpe tata ya munu, “Oh, mu zaba kuzenga masa,” na mwa kiziba yayi awa na Utica Pike.

195 Kilumbu mosi, papa kwendaka vwanda na kanivo, yandi tubaka, “Mu zola kumona nge kuzenga masa.” Mwa kiziba yina vwandaka ya mudindu mutindu *yayi*. Mu vwandaka ya kutelema na zulu ya bwati ya sabuni. Mu katulaka bilele, mpe mu mataka mpe mu kangaka mbombo ya munu mutindu *yayi*, mpe mu dumukaka mwa fioti na zulu ya bwati ya sabuni. Mu lemukaka, poto-poto panzanaka na diboko ya kibakala mpe ya kikento, mpe mu bandaka na kubaluka na poto-poto.

Mu tubaka, “Wapi mutindu mu ke sala, Papa?”

196 Yandi tubaka, “Basika kuna.” Kuzenga masa? Kukomvula na poto-poto, yawu yina ya vwandaka ntangu nionso.

197 Beto kele na bamambeke mingi ya dibuundu yina ke na kukomvula na poto-poto, diaka. Ya kele kieleka. Ya kele kieleka, bantu yina ke na kukomvula na kati ya poto-poto. Yinga, tata.

198 Kilumbu mosi, noko ya munu basisaka munu na masuwa mpe mu vwandaka kukitombola ti mu zaba kuzenga masa; kuna na Nzadi ya Ohio, mudindu ya masa vwandaka pene ya b-metre sambanu. Yandi bakaka kaka nkayi mpe losaka munu na maza, yandi tubaka, “Ntangu yayi nge lenda talisa yawu?” Amen. Alleluia! Mu lendaka zenga masa to mu ke dinda, kuna. Oh, la la!

199 Kulutila mbote kumesana na Yawu na ntangu yayi. Beno kwenda na yinto yina ke basisa masa, kisika Nzambi ke zibula ditadi kuna na ntoto ya kuyuma mpe ke basisa yawu kulutila mingi. “Tuba na Ditadi,” Yandi tubaka, “mpe ya ke basisa masa ya Yawu.”

200 Mu banza ti, nkundi ya munu, na nkokila yayi, mu banza ti nge ke na kufwa. Nge fwana zonza na Ditadi. Ya kele kieleka.

201 Ya lendaka vwanda ti beno me kwenda bisika nionso. Ya lendaka vwanda beno me kwenda na dibuundu, mpe beno me kuma Methodiste, mpe beno me kuma Baptiste; mpe ntangu yankaka ba me dasukila beno, mpe beno me kwenda na ba-Presbytérien; mpe na manima beno me kwenda na ba-Pentecotiste, kuna na ba-Nazaréen, kuna na ba-Pelerin de la Sainteté. Mpe beno ke bakula kaka ve bima yayi.

202 Beno ke tuba kaka na Ditadi, na nkokila yayi. Kaka... Beno kele na ngwisani na Yandi? Yinga. Yandi tubaka, “Tuba na Ditadi, mpe Yandi ke basisa masa ya Yandi.” Ya ke basisa masa ya Yandi, kana nge ke... Kubula Yawu, diaka ve. Tuba kaka na Yandi. Beno tuba na Yandi kaka, na mutindu ya bankundi.

203 Mu banza ti beno kwendaka na dokotolo. Mu banza ti beno me sala nionso yina beno lendaka sala, samu na kumeka kukuma mbote. Mu banza ti beno me sala nionso yina beno lendaka sala na ngolo ya beno, na kutala, mpe beno lenda beluka ve. Konso dokotolo, beno me luta na bureau nionso beno me zaba, mpe dokotolo tubaka, “Nge kaka... Kima mosi ve ba lenda sala samu

na nge.” Samu na yinki beno ke tuba ve na Ditadi, na nkokila yayi? Yandi ke . . . Yandi ke na bamasa ya Luzingu kuna samu na beno, na kupesaka beno Luzingu ya kulutila mingi.

<sup>204</sup> Kilumbu mosi ya vwandaka na kento mosi, na kati ya Biblia, na nkumbu ya Agar. Mu ke banzaka na yandi. Mpe mu ke zola kusukisa; ntangu me lunga. Ya vwandaka na kento mosi na nkumbu ya Agar, mpe yandi vwandaka na mwa bébé mosi. Ba fidisaka yandi na ntoto ya kuyuma, na mwa diyuki mosi ya maza. Yandi disaka mwana yayi ya fioti, kilumbu ya muvimba. Kasi masa kondwaka, na kati-kati ya kilumbu, mpe mwa bébé yango vwandaka boka mpe vwandaka dila. Mwa bikoba ya yandi yumaka mpe ludimi ya yandi vimbaka. Mama mosi ya mputu, ya zola, yinki yandi lendaka sala? Yandi sosaka bisika nionso, samu na kuzwa masa, kasi yandi kuzwaka yawu ve. Yandi lendaka ve kukanga ntima na kumona mwa bébé ya yandi kufwa; mpe yandi kwendaka ntama fioti na kitamina ya mbangu ya tolo-tolo.

<sup>205</sup> Mpe yandi fukamaka mpe tubaka na Ditadi. Ntangu yandi tubaka na Ditadi, Wanzio mosi zonzaka mpe tubaka, “Agar, yinki yina ke basika kuna?”

<sup>206</sup> Ya vwandaka na dibulu ya masa, ya kifuluka na masa, yina ke na kubasika diaka bubu yayi. Na manima pene ya bamvula mafunda yiya, yawu ke na kubasika diaka bubu yayi. Kiziba yina Agar . . . kuna, yina, yawu ke na kubasika diaka bubu yayi. Yandi tubaka na Ditadi, mpe Ditadi basisaka maza.

<sup>207</sup> Ya vwandaka na bana ya ba-Hebreux kotaka na dibulu ya tiya, kilumbu mosi, mpe bawu tubaka na Ditadi. Mpe Ditadi vwandaka na bawu.

<sup>208</sup> Ya vwandaka na kento mosi katukaka na Samarie, kilumbu mosi. Yandi lembaka ntima. Yandi vwandaka nsumuki, mpe yandi vwandaka na bima mingi ya kukangama na luzingu ya yandi, mu banza. Mpe yandi lembaka nzutu. Yandi kwendaka na dibulu ya masa ya Jacob samu na kusosa nkindusulu, mpe yandi vwanda vutuka. Yandi vwanda kwenda na dibulu ya masa ya Jacob, mpe yandi vwanda vutuka. Mpe kilumbu mosi yandi vwandaka na dibungu ya masa, mpe yandi vwandaka me telama kuna, ya kulemba nzutu. Mpe Ditadi vwandaka ya kutelama kuna, pene-pene ya yandi. Yandi zonzaka na Ditadi yina. Yandi pesaka yandi yinto ya nene ya maza na kati ya moyo ya yandi. Yandi kimaka mbangu na kati ya mbanza. Yandi me kwizaka ata fioti ve samu na kubaka masa, dyaka ve. Yandi kuzwaka Luzingu. Yandi tubaka, “Beni kwisa, beni tala Muntu yina me tuba na munu mambu nionso mu salaka. Yayi kele Klisto ve?” Yandi tubaka na Ditadi, mpe Ditadi basisaka maza ya Yawu.

<sup>209</sup> Ya vwandaka na mwa kento mosi yina bebisaka mbongo ya yandi nionso na badokotolo, ya luvunu, yina bakaka mbongo ya yandi nionso. Ba lendaka ve kukanga kubasika ya menga ya yandi. Yandi simbisaka ferme ya yandi, mpe mu banza yandi

tekaka yawu. Mpe yandi vwandaka ya kuvwanda kilumbu mosi, yandi vwandaka tunga lele, mpe yandi kuwaka Kima mosi ke tambula kuna na bala-bala. Yandi tubaka na Ditadi. Ditadi balukaka mpe tubaka, “Nani me simba Munu?” Nionso manaka kuna ntangu yandi tubaka na Ditadi. Yandi pesaka yandi yinto ya masa ya Luzingu, yina kangaka kubasika ya menga. Menga kangamaka, na nswalu nionso.

<sup>210</sup> Ya vwandaka na mulombi mosi ya kiboba ya kufwa meso yina vwandaka pene-pene ya kibaka, kilumbu mosi, ke tekita na madidi. Yandi vwandaka diaka na kima mosi ve. Mpe yandi vwandaka kuna, muntu ya mawa, mpe bantu vwandaka luta na lweka ya yandi. Yandi kuwaka Kima mosi kuwiza; yandi tubaka, “Yinki ya kele?” Mpe yandi tubaka na Ditadi.

<sup>211</sup> Ata ti, bamambele ya dibuundu ya yandi, pene-pene ya yandi, mekaka na kutelemina yandi, na kutubaka, “Ya kele ve na mfunu. Nge lenda ve kuzwa yawu. Vwanda ntama. Vwanda swi.”

<sup>212</sup> Kasi yandi bokaka ngolo mingi, “Nge mwana ya David, wila munu mawa! Wila munu mawa!” Mpe yandi tubaka na Ditadi, mpe Ditadi pesaka yandi yinto ya masa, mpe meso ya yandi zibukaka.

<sup>213</sup> Ditadi yina mosi vwandaka na ntoto ya kuyuma kele awa bubu yayi. Ya ke sala ti bantu kusepela.

<sup>214</sup> Kilumbu mosi, Jérusalem nionso vwandaka ya kutelema kuna samu na kutala munganga ya Kinzambi, exalté mosi, vwandaka kota na kati ya mbanza; na bantu fioti vwandaka kuna, ba vwandaka boka na ndinga ya ngolo, “Hosanna! Hosanna, na Yandi yina ke kwiza na Nkumbu ya Mfumu!”

<sup>215</sup> Bamambele ya dibuundu ya nkumbu yina vwandaka kuna na bamvwela ya bawu ya yinda, na ba-Doctorat ya bawu ya Théologie; tubaka, “Bawu vwanda swi. Oh, la la, ba ke pesa munu madidi na mukongo, mpe nionso yina. Bawu vwanda swi.”

<sup>216</sup> Yandi tubaka, “Kana bawu vwanda swi, matadi ke boka na nswalu nionso.” Samu na yinki yayi? Ditadi yina kaka katukaka na mongo, kukondwa diboko, yina vwandaka kwisa, vwandaka baluka na Jérusalem. Mwa matadi ya fioti vwandaka kunwa na Yawu. “Tuba na ditadi, mpe Yawu ke basisa masa ya Yawu.”

<sup>217</sup> Kana beno ke na nsatu ya mpulusu, na nkokila yayi, beno tuba na Ditadi. Yawu ke basisa masa ya Yawu. Kana beno kele retrograde, na nkokila yayi; beno tuba na Ditadi, Yawu ke basisa masa ya Yawu. Kana beno kele awa, na nkokila yayi, mpe kukondwa Klisto; beno me meka na mabuundu nionso kele, na kati ya mbanza, samu na kuzwa mpulusu; beno tuba na Ditadi, Yawu ke basisa masa ya Yawu. Beno ke kwikila yawu? Kana beno kele retrograde, beno me kwenda ntama na Nzambi, beno ke banza ti ya kele ve na siansi samu na beno; beno tuba kaka na Ditadi, mpe Yawu ke basisa masa ya Yawu.



218 Beno ke kwikila yawu, na ntima ya beno ya muvimba? Beno ke kwikila ti Nzambi ke pesa yawu? Na ntima ya beno ya muvimba, beno ke kwikila yawu? Alleluia! Yandi kele awa na nkokila yayi.

219 Kana beno kele mbevo, mpe beno me meka nionso na yinza. Beno me meka na kukota na ndonga ya bisambu, mpe beno lendaka ve kukota na ndonga ya bisambu. Ba me pesaka beno bakalati ya bisambu, mpe ba me bokilaka beno ve. Beno kwendaka na lukutakanu mosi; beno kwendaka na lukutakanu yankaka. Ba me pakula beno na pasteur. Beno lutaka na ndonga yayi ya bisambu. Beno me vwanda bisika nionso, mpe beno lenda beluka ve.

220 Samu na yinki beno ke tuba ve na Ditadi ntangu yayi? Yandi ke basisa masa ya Yandi. Ya kieleka. Samu na yinki beno lenda ve kumeka diaka na Yandi? Beno vwanda na ngwisani na Yandi, kaka na ntangu yayi, na ntangu Yandi kele na kati ya kivinga. Mvwandulu ya Yandi kele awa na ntangu yayi samu na kubelula beno nionso. Mu ke kwikila yawu. Mu zaba yawu, na ntima ya munu ya muvimba. Mu ke kwikila. Mpe ya kele na mambu yankaka mu zaba ve, kasi ya kele na mambu yankaka mu zaba. Mpe mu zaba ti Yesu Klisto, Mwana ya Nzambi ya moyo, kele kaka awa.

221 Na ntangu mu ke meka na kusala lubokilu mosi na autel, na kati ya ntima ya munu, ba-vision ke na kupanzana bisika nionso na kivinga ya kaka—kaka na ntangu yayi. Oh, ya kieleka. Bangolo ya Nzambi kele kaka awa. Ya kieleka. Mu ke na kumona Yandi kusala awa. Ya me banda na kunata munu na kitezo mosi na yankaka, na ntangu yayi; samu bambevo kele awa, mpe bisambu ya beno kele yina ke salaka yawu; samu na kusiamisa Ndinga ya Nzambi, yina ke tuba ti Yandi kele awa samu na kutuba na Yandi, na nkokila yayi, Ditadi mosi yina telamaka mpe zabaka mabanza ya bawu. Yina monaka kisika kento yina vwandaka, yina vwandaka basika menga, mpe nionso yina. Yandi kele awa ntangu yayi. Kana beno ke tuba na Yandi, Yandi ke basisa maza ya Yandi. Beno ke kwikila yawu na ntima ya beno ya muvimba?

222 Yinki nge ke banza, mama? Na . . . Kaka kuna na kati-kati. Ntangu yayi, nge ke na kalati ya bisambu ve, mutindu yina? Mama yina ke na kima ya mpembe pene-pene ya nkingu ya yandi, yandi me vwanda kuna. Nge ke na diabete, mutindu yina ve? Nge ke na kalati ya bisambu ve, mutindu yina ve? Nge ke na nsatu ya kalati ya bisambu ve. Nge ke kwikila yawu? Nge ke banza ti nge lenda tuba na Ditadi? Nge zola tuba na Yandi, samu na diabete ya nge, na ntangu yayi? Telama ntangu yayi. Ya kieleka? Tuba kaka, “Mu ke ndima Yesu Klisto ntangu yayi mutindu munganga ya munu,” mpe Nzambi ke nata nge na yinzo mpe ke belusa nge. Tuba na Ditadi. Nzambi sakumuna nge. Mbote mingi. Kwenda, mpe beluka.

223 Yinki nge ke banza samu na yawu, mama, yina me vwanda na lweka ya yandi? Nge ke na varice na makulu ya nge, mutindu yina ve? Ya kieleka. Telama. Yina kele ve bakala ya nge me vwanda na lweka ya nge kuna? Ya kieleka? Nge ke na diabete, diaka, mutindu yina ve? Ya kieleka? Tula diboko ya nge na zulu ya kento ya nge. Mbote mingi. Beno zole kele ya Illinois. Ya kele kieleka ve? Ntangu yayi beno vutuka na Illinois, beno tuba na Ditadi, mpe ya ke bika beno mpe ya ke vutuka dyaka ve. Alleluia!

224 Mu zaba kima mosi, ti Ditadi kele awa, Ditadi ya Bansungi yina ba bulaka na ntoto ya kuyuma. Ya kieleka.

225 Yinki beno ke banza samu na yawu, ntwenia ya mama yina kuna na bafelele yina na yimpu ya beno? Yina me vwanda kuna na arthrite, ke na kumeka na kubasika na yawu. Nge yina me baluka mpe nge me tala na lweka yina yankaka, nge ke kwikila na ntima ya nge ya muvimba ti Nzambi ke belusa nge? Telama ntangu yayi, mpe bula makulu ya nge, mpe tuba, “Arthrite me kwenda,” mpe ya ke mutindu yina. Tuba na Ditadi, mpe Yandi ke basisa . . . ? . . .

226 Mu ke tuba na beno, Yesu Klisto mutindu mosi, mazono, bubu yayi, mpe kukonda nsuka. Yandi kele awa samu na kutalisa nionso yina . . .

227 Yinki nge ke banza samu na yawu, mama yina me vwanda kuna, yina me tuba, “lukumu na Mfumu,” na mpasi yina ya bakento, na mwa kazaka ya vert, na zulu ya mukongo, ya kuvwanda kuna? Nge ke kwikila ti Nzambi me belusa nge ntangu yayi? Telema, na mwa ntangu fioti; ya kuvwanda kuna. Nge ke kwikila na ntima ya nge ya muvimba? Nge ke na mpasi ya bakento. Ya kele kivimbu. Nge kele na tube, mutindu mwa nzila mosi ke basika na yawu. Yina kele ve ya kieleka? Kana ya kele kieleka, telemisa diboko ya nge. Yinki ke sala ti mu tuba yawu? Ya kele Ditadi yina ke na kutubaka na beno. Beno tuba na Yandi, mpe beno beluka. Alleluia!

228 Oh, mutindu Yandi zola talisa bakumonisama ya Yandi ya ngolo ya Yandi! Mpe mu ke mona Wanzio ya Nzambi, Dikunzi ya Tiya mosi yina vwandaka landa bana na ntoto ya kuyuma, yina ke na kuluta na yinzoo yayi na ntangu yayi.

229 Mu ke na kumeka na kutala kento mosi. Yandi ke na kusambila. Wapi kisika yandi kele awa? Yandi yayi me telama awa. Yinga, ya kele kento mosi ya ntwenia ya kutelama kaka kuna, yandi kele ya kuvwanda na ndonga ya zole kuna. Ve, yandi . . . Ya ke samu na bakala mosi, yina me telema. Ya ke bakala ya kinwa-malafu yina nge ke sambila. Ya kieleka ve, mama? Kana ya ke mutindu yina, telema kuna. Nge ke na bakala ya kinwa-malafu ve yina nge ke sambila? Kana yina ke kieleka, telemisa diboko na nge. Tuba na Ditadi, mpe Nzambi ke basisa yandi na—na kima yayi.

<sup>230</sup> Nzambi ke sala kima mosi na kati awa, kana nge ke sala yawu kaka. Nge ke kwikila yawu? Nge kele na ngwisani na Yandi? Kana nge kele, telama kaka ntangu yayi mpe tuba na Ditadi, mpe Ditadi, ke basisa masa ya Yandi. Beno lenda telama?

<sup>231</sup> Nani ke zola Yandi samu na mpulusu? Beno telemisa maboko ya beno, beno tuba, “Mu ke zola Yandi kwisa na kati ya ntima ya munu.” Nzambi sakumuna nge. Nzambi sakumuna nge. Nzambi sakumuna nge. Nzambi sakumuna nge, nge, nge, mpe nge. Oh, la la! Yinga, tata.

<sup>232</sup> Cancer yina me bika nge kuna, mpangi ya munu ya bakala. Yawu me kwenda. Nge lenda vutuka na yinzo mpe kuvwanda ya kubeluka ntangu yayi. Alleluia! Ya kieleka.

<sup>233</sup> Bayina nionso zola beluka, beno telemisa diboko ya beno, beno tuba, “Mfumu, mu ke na kutuba na Nge. Mu ke na kutuba na Nge.” Ya kele kieleka.

<sup>234</sup> Yandi yina ke na kwenda. Tata, mpasi ya nge ya sinus me bika nge kuna. Nge kele na kimpwanza. Vutuka na yinzo; na Nkumbu ya Yesu Klisto, nge me beluka.

<sup>235</sup> Muntu nionso awa, yina zola mona Yandi ntangu yayi, beno telemisa maboko ya beno mpe beno tuba, “Matondo na Nge, Mfumu, samu na kubeluka ya nzutu ya munu. Mu ke tuba na Nge, na Nkumbu ya Yesu Klisto, ti Nge belusa munu.”

<sup>236</sup> O Nzambi, ya kyadi, fidisa ngolo ya Nge na nkokila yayi, na kupakulama ya Mpeve-Santu, na yina Yandi kele na kati ya kivinga yayi na ntangu yayi, ke na kuyala dibuundu yayi. Mpe bika ti Mpeve-Santu kusala bimangu nionso. Bika ti ya vwanda ve na mbevo to kikata mosi me bikana na yinzo yayi na nkokila yayi. Bika ti Nge belusa muntu nionso, na Nkumbu ya Yesu Klisto.



*MPULUSU NA MUVIMBA NA YAWU, NA KIESE* KNG54-0330  
(Redemption In Completeness, In Joy)

Nsangu yayi ya Mpangi William Marrion Branham, kulongamaka na Kingelesi, na Kilumbu ya zole na nokila, na kilumbu ya 30 ya Ngonda ya tatu, na mvula 1954, na Dibuundu ya Porte Ouverte na Louisville, Kentucky, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)